

# JAVNA I KULTURNA DJELATNOST ŠKOLE U ŠKOLSKOJ 2021/2022. GODINI

## Počela nova školska 2021/22. godina

Nastava u novoj školskoj godini godini počela je u srijedu 1. septembra 2021. godine. Dan prije, 31. augusta, izvršen je upis svih učenika Medrese. Ovu godinu je upisano 253 učenika i 256 učenica, ukupno 509. Nakon upisa održani su i roditeljski sastanci s razrednicima i odgajateljima.

Ove godine prvi razred je upisalo 66 učenika i 76 učenica. Učenici su raspoređeni po odjeljenjima : osam odjeljenja učenika i osam odjeljenja učenica.

Nastava u prvom polugodištu završava 31. decembra, a zimski raspust traje do 16 januara 2022. godine.

Ramazan počinje 2.4.2022. godine. Maturanti završavaju redovno pohađanje nastave 18.maja 2022. godine.

Zahvaljujući poboljšanoj epidemiološkoj situaciji i vakcinisanju profesora ove godine svi učenici su zajedno u školskim klupama, uz obavezno nošenje maske i poštivanje epidemioloških mjera.

## Bunar za Afriku

Dugogodišnja saradnja Međunarodnog foruma solidarnosti Emmaus i Behram-begove medrese okrunjena je još jednim lijepim humanitarnim djelom.

U Nigeru, u Africi, izgrađen je bunar za potrebe lokalnog stanovništva, a to je učinjeno od sredstava koja su prikupljali učenici i profesori naše škole. Akcija je okončana tokom ljeta.

Tako se na najljepši način još jednom pokazala humanost kojom se naši učenici i profesori mogu ponositi.

## Bosanska Amerikanka podučava engleskom jeziku

Ove školske godine u Medresi će biti Aida Smajić iz Sjedinjenih Američkih Država. Ona će kod nas boraviti od septembra 2021. do jula 2022. godine i u tom periodu će podučavati naše učenike i profesore Medrese engleskom jeziku i američkoj historiji i kulturi.

Ona će raditi s učenicima na redovnoj nastavi engleskog jezika, te sa polaznicima Access programa.

Aida Smajić dolazi iz Atlante, država Georgia u Sjedinjenim Američkim Državama. Studirala je international business u oblasti javnog zdravstva. U našoj školi će raditi kao Fulbright English Teaching Assistant, a ove godine Behram-begova medresa je njen domaćin.

Ovaj program je podržan od Vlade Sjedinjenih Američkih Država.

## Učenik stare u današnjoj Medresi

U ponedjeljak 20. septembra ove godine kod nas je boravio Muhamed-ef. Aganović, učenik stare Behram-begove medrese iz četrdesetih godina prošlog stoljeća. On je našu školu završio u predzadnjoj generaciji, prije no što su tadašnje socijalističke vlasti dekretom zabranile njen rad.

Domaćin mu je bio direktor Ahmed Hatunić, koji je gostu izrazio veliku zahvalnost zbog ove posjete, te predstavio rad naše škole i upoznao ga s nastavnim planom i programom. Bila je ovo

prilika da se uporede uslovi i okolnosti rada škole u tim davnim i u današnjim vremenima.

Gost se prisjetio svojih učeničkih dana i profesora koji su mu predavali, te izrazio veliku zahvalnost što je bio u prilici da boravi u našoj školi i da podijeli svoja sjećanja na minula vremena.

Muhamed-ef. Aganović rođen je 1934. godine. Završio je Behram-begovu medresu 1948. godine. Penziju je dočekaao u džematu Bikodže na području Medžlisa Islamske zajednice Puračić.

## Promoviran uvod u Mesneviju

U četvrtak 23.9.2021. godine u Behram-begovoj medresi je promovirana knjiga Šemsudina Tabrizija Razgovori. Knjigu je s engleskog jezika preveo dr. Samir Delibegović, a izdao ju je Centar za kulturu i edukaciju Logos iz Tuzle.

O knjizi su govorili dr. Sead Seljubac i dr. Rusmir Šadić. Oni su u svojim izlaganjima istakli činjenicu da se ovome djelu mora pristupiti s puno vremena i neprestano razmišljajući dok se čita.

Prevodilac i jedan od promotora dr. Samir Delibegović, poznati tuzlanski hirurg i profesor hirurgije na Univerzitetu u Tuzli, u svom obraćanju je kazao da je ovo jedno izuzetno djelo i da ova knjiga po svom značaju zauzima mjesto odmah do čuvene Mesnevije. On ju je s engleskog jezika preveo na bosanski jezik.

U ime organizatora promocije obratio se direktor Behram-begove medrese dr. Ahmed Hatunić.

## Predavanje o oralnoj higijeni

O Važnosti oralnog zdravlja i prevenciji karijesa učenicima prvog razreda Medrese su u utorak 26.9.2021. godine govorili načelnica stomatologije u Domu zdravlja Tuzla dr. Mirjana Duspara i specijalista oralne medicine i parodontologije dr. Admir Brkičević.

Doktorica Duspara je pričala o posljedicama karijesa na oralno zdravlje, o uzrocima ove bolesti, njenom liječenju i o preventivnim koracima. Također je pričala o najčešćim oboljenjima zubne

šupljine i o načinu na koji se mogu izbjeći ovi problemi i kako da se posjeta zubaru svede na redovnu kontrolu.

Dr. Admir Brkičević je govorio o pravilnom načinu čišćenja zubi, te je dao neke korisne savjete o pravilnoj higijeni zubi.

Edukacija o oralnom zdravlju i higijeni koju provodi tim iz Doma zdravlja u Tuzli je već tradicionalna u našoj školi, a sljedeći korak jeste pregled zubi kod naših učenika prvog razreda u Domu zdravlja.

## Misak na Hayatu i BIR-u

U četvrtak 30. septembra 2021. godine članovi redakcije našeg školskog lista Misak putovali su u Sarajevo, radi edukativne posjete televizijskoj kući Hayat i radiju Bir.

U Vogošći im je domaćin bio dugogodišnji uposlenik Hayat televizije i sadašnji urednik kanala Hayatovci Emir Ovčina. On je gostima pokazao televizijske studije i predstavio poznata lica Hayata. Bila je to prilika da se gosti upoznaju s produkcijom i emitiranjem televizijskog programa. U prilogu koji je ekipa ove televizije snimila i emitirala u svom programu učestvovali su članovi redakcije Harun Bečić, Esma Aličić i Azur Čeliković, dok su gošće u emisiji Otvoreni studio bile koordinatorica lista prof. Senada Mehmedćehajić i urednica Sumeja Muratović.

Druga destinacija je bio Media centar Islamske zajednice u BiH i sjedište BIR radija u sklopu ovog Centra. Tamo im je dobrodošlicu poželio direktor Media centra Amir Sakić. Upoznao ih je s radom radija BIR i jednog od najstarijih listova u Bosni i Hercegovini islamskih informativnih novina Preporod. U svom programu je ovu posjetu popratila i BIRTV, a lektorica Misaka Maida Mehmedćehajić i član redakcije Tarik Junuzović su govorili o našem listu i o samoj našoj Medresi uživo u programu radija BIR.

## Zuhdija Delić novi hafiz Behram-begove medrese

Hafiska dova Zuhdiji Deliću proučena je u subotu 2. oktobra 2021. godine u džamiji u Donjoj Lukavici, Medžlis Islamske zajednice Živinice. Muhafiz mu je bio hafiz Nedžad Vehabović.

Pred Komisijom Rijaseta Islamske zajednice u Bosni i Hercegovini hifz je položio 8. septembra 2021. godine.

Dovi su prisustvovali direktor Behram-begove medrese Ahmed Hatunić, izaslanik Reisul-uleme Islamske zajednice u Bosni i Hercegovini Dženan Handžić, direktor medrese Osman-ef. Redžović u Velikom Čajnom kod Visokog, rukovodilac Službe za pravne i administrativne poslove Muftijstva tuzlanskog Muamer Zukić, predstavnik Fondacije za hifz Džemal Muslih, gradonačelnik Živinica Samir Kamenjaković, glavni imami, imami, hafizi, muderrisi, vakifi, članovi porodice i džematlije, te rodbina i prijatelji.

Hafiz Zuhdija Delić rođen je 2002. godine u Tuzli, od majke Naze i oca Zuhdina. Osnovnu školu završio je u Živinicama. Zapažene rezultate ostvario je i kao polaznik mekteba pod mentorstvom svog muallima Samir-ef. Krbuljića. Behram-begovu medresu je upisao 2017. godine, kada je i počeo učiti hifz.

## Generacija s puno hafiza

U prethodnom periodu troje, sada već bivših, učenika naše škole završilo je hifz i okrunilo se zvanjem čuvara Božije riječi.

Adni Ibrahimović dova je proučena 18. septembra ove godine u Dibekhana džamiji u Tešnju. Njen muhafiz je bio Edin Dedić, profesor kiraeta u Behram-begovoj medresi, kome je hafiza Ibrahimović deseti kandidat koga izvodi u zvanje hafiza Kurana Časnog. Ona je 83. hafiz naše škole. Hafiskoj dovi je prisustvovao i predsjedavajući Doma naroda Parlamentarne skupštine Bakir Izetbegović. Dovi su još prisustvovali i izaslanik Reisul-uleme hafiz Senaid Zaimović, direktor Vakufske direkcije, i muftija zenički Mevludin-ef. Dizdarević, te imami, muderrisi, mnogobrojna rodbina i prijatelji.

Adna Ibrahimović je rođena 2002. godine u Zenici, od oca Nermina i majke Aide. Završila je osnovnu školu u Tešnju. Behram-begovu medresu je upisala 2017. godine. Njen otac Nermin i amidža Maid su hafizi.

Fadilu Umihaniću proučena je hafiska dova 19. septembra 2021. godine u džamiji u Bašigovcima Gornjim, Medžlis Islamske zajednice Živinice. Muhafiz mu je bio Nedžad Vehabović, kojemu je ovo sedmi

kandidat kojeg izvodi u zvanje hafiza Kurana Časnog. On je 82. hafiz naše škole, a osmi hafiz u svojoj generaciji. Dovi su prisustvovali direktor Behram-begove medrese Ahmed Hatunić, muftija tuzlanski Vahid-ef. Fazlović, izaslanik Reisul-uleme Islamske zajednice u Bosni i Hercegovini hafiz Mensur Malkić, predsjednik Sabora Islamske zajednice u Bosni i Hercegovini Safet Softić, predstavnik Fondacije za hifz Džemal Muslih, glavni imami, muderrisi, porodica i prijatelji.

Hafiz Fadil Umihanić rođen je 2001. godine od majke Šefike i oca Šekiba. Osnovno obrazovanje je završio u Tuzli, a Behram-begovu medresu je upisao 20017. godine.

Hafiska dova Zuhdiji Deliću 84. hafizu naše škole, proučena je u subotu 2.10.2021. godine u džamiji u Donjoj Lukavici, Medžlis Islamske zajednice Živinice.

## Obilježen Dan škole

Dan Behram-begove medrese (šesti oktobar) svečanim programom je obilježen u petak 8. 10. 2021. godine.

U svim odjeljenjima je održan čas odjeljenske zajednice, na kojem se učenicima govorilo o historijatu naše škole.

Svečani program koji je uslijedio poslije izveli su učenici horske i recitatorske sekcije. Prisutnima se obratio direktor Behram-begove Ahmed Hatunić. On je svima zaželio sretan Dan škole i podsjetio je sve na važnost obrazovanja.

Na svečanosti je bio i muftija tuzlanski Vahid-ef. Fazlović, koji je u svome obraćanju govorio o počecima rada naše škole, prisjetio se ratnog vremena i uslova u kojima je Medresa započela rad.

I ove godine dodijeljena su priznanja dugogodišnjim uposlenicima Behram-begove medrese. Ovogodišnje priznanje iz reda profesora dobili su profesorica engleskog jezika u našoj školi Amila Hasanspahić i profesor kiraeta hafiz Edin Dedić, a iz reda tehničkog osoblja Mejra Šljivo i Šahman Kalajevac, oboje radnici u školskoj kuhinji.

Proglašeni su i najbolji učenici u prošloj školskoj godini: Husein Jašić Ia, Abduselam Hasanbašić Ib, Emina Husić Ic, Fatima Huskanović Id, Ahmed Avdibašić IIa, Muhamed Dedić IIb, Lamija Mujčinović

IIC, Tahira Zukić IID, Faris Keserović IIIa, Atif Mekić IIIb, Ajla Baturić IIIc i Fatima Halilović IIId.

Za najbolja odjeljenja proglašena su: IIId, IIIc i IIC, dok je odjeljenje s najmanje izostanaka bilo IIIa.

Za najuspješnijeg sportistu proglašen je Tarik Saletović.

Povodom Dana škole raspisan je i literarni konkurs na temu: A nikad nisam, kad sam ti, Gospodaru moj, molbu uputio nesretan ostao (Kur'an; Merjem:4). Prvo mjesto je osvojila Medina Hatunić, drugo mjesto Maida Mehmedćehajić a treće Fatima Halilović. Za najčitaoca je proglašena Ahmedina Ramić.

## Svečano obilježen Dan vakifa

U subotu 9.10.2021. godine u našoj školi je obilježen njen Dan vakifa.

Na svečanosti kojoj se odazvao veliki broj iskrenih i velikih prijatelja Medrese, izveden je zanimljiv kulturni program, koji su pripremili naši učenici.

I ove godine dodijeljene su vakufname novim vakifima Behram-begove medrese, koji su uložili dio svojih dobara i pomogli rad škole i školovanje njenih učenika.

Na svečanosti su se obratili direktor naše škole Ahmed Hatunić i pomoćnik muftije tuzlanskog Mensur Husić. Direktor Hatunić se prisjetio početaka rada Behram-begove medrese. Spomenuo je promjene koje su ove godine uvedene u Nastavni plan i program. Pričao je o svim projektima koji su realizirani u kompleksu Medrese, zahvaljujući upravo velikodušnosti dobrih ljudi, prijatelja naše škole. Rezultati predanog rada i u prošloj godini jeste veliki broj dobrih rezultata u učenju i vladanju i osvojenih prvi mjesta na učeničkim takmičenjima u Tuzlanskom kantonu i u Bosni i Hercegovini.

## Učenice trećeg razreda u Zemaljskom muzeju i na Kovačima

U subotu 9.10.2021. godine učenice trećeg razreda posjetile su Sarajevo. Posjeta je iskorištena za obilazak Zemaljskog muzeja i šehidskog mezarja Kovači. U muzeju su učenice imale priliku da

se upoznaju sa kulturnim i nacionalnim naslijeđem Bosne i Hercegovine i njenih naroda. Bila je ovo prilika da se pogledaju ekspozitni razvrstani po odjeljenjima arheološko, etnološko i odjeljenje prirodnih nauka. Posjetile su i šehidsko mezarje Kovači gdje im je održan historijski čas o rahmetli predsjedniku Aliji Izetbegoviću i šehidima koji su poginuli u Agresiji na našu zemlju.

## Obilježen Poslanikov rođendan

U ponedjeljak 18.10.2021. u našoj džamiji je proučen tradicionalni mevlud, kojim smo se prisjetili rođenja Muhammeda, a.s.

Program je pripremio i izveo hor naše škole, a sastojao se od savremenih izvođenja mevluda (spjevova o Poslaniku, a.s.) i ilahija i kasida.

Prigodnu besjedu na ovoj svečanosti je održao dr. Mustafa Gobeljić, glavni imam Medžlisa Islamske zajednice Brčko. On je govorio o Božijem poslaniku kao uzora u moralu, ponašanju i ophođenju s ljudima. Njegov životni put trajna je inspiracija za sve ljude, a naročito mlade, u svim vremenima.

Uz direktora Medrese Ahmeda Hatunića, profesore i učenike Medrese, dragi gosti na svečanosti su bili profesori i učenici Gimnazije Meša Selimović, Medicinske i drugih škola iz Tuzle.

## Amel Tuka se družio s učenicima Medrese

Poznati bosanskohercegovački atletičar, olimpijac i uzor mladih Amel Tuka boravio je u Medresi. On se u utorak 19.10.2021. godine u poslijepodnevnim satima družio s učenicima naše škole. U džamiji Medrese se prisjetio šta za njega znači biti vjernik, koliko je vjera utjecala na njegov život i kako mu pomaže da se izbori s raznim izazovima u životu. Istakao je važnost autoriteta od roditelja, učitelja, profesora pa sve do trenera. Samo rad, disciplina, dosljednost i vjera u Boga i u sebe mogu dovesti do izuzetnih rezultata u životu, pa i u sportu, naglasio je. Kaže da je uvijek s ponosom isticao odakle potiče, koje je vjere i nacije i zato je uvijek nailazio na simpatije i poštovanje kod ljudi svuda u svijetu.



Nakon ugodnog razgovora s učenicima uslijedilo je fotografiranje: svi su željeli da imaju lijepu uspomenu na ovo druženje.

Amel Tuka je osvajač srebrne medalje na Svjetskom prvenstvu u 2019. godini i bronzane medalje na Svjetskom prvenstvu 2015. godine. Vlasnik je državnog rekorda u disciplinama na 400 i 800 metara.

## Dodijeljeni certifikati polaznicima Access programa

Dodjela certifikata učenicima koji su završili Access program bila je u četvrtak 14.10.2021. godine u amfiteatru Behram-begove medrese u Tuzli. Certifikate je dodijelio direktor Behram-begove medrese Ahmed Hatunić koji se i obratio učenicima. Ove godine program je uspješno završilo 20 učenika i učenica naše škole. Administrator Access programa u medresama u Bosni i Hercegovini je naš profesor engleskog jezika Asmir Dorić.

Učenicima se video porukom obratila zamjenica ambasadora Sjedinjenih Američkih Država u Bosni i Hercegovini Deborah Mennuti.

Access je program Američke vlade koji se u našoj školi provodi uz podršku Ambasade Sjedinjenih Američkih Država u Sarajevu i Rijaseta Islamske zajednice u Bosni i Hercegovini od 2005. godine. Ovo je prilika da učenici unaprijede svoje poznavanje naprednog engleskog jezika i druge praktične i akademske vještine.

## Program dobrodošlice za učenice prvog razreda

U utorak 26.10.2021. godine u punoj fiskulturnoj sali Behram-begove medrese održan je program dobrodošlice, koje su pripremile učenice drugog razreda. Program se svake godine održi kao znak dobrodošlice učenicima prvog razreda naše škole. Uz učenje ilahija i kasida, recitacija, pripremljen je i kraći dramski program, a izvele su ga učenice trećeg razreda.

Također su pripremljeni i prigodni pokloni za učenice prvog razreda oba odjeljenja.

Program je obilovao veselim sadržajima, pa su se učenice lijepo osjećale. I svakako su ponijele sa sobom uspomene na ovo zanimljivo druženje koje će dugo pamtili.

## Ministar Baraković u Medresi

U petak 29. oktobra ove godine, Behram-begovu medresu je posjetio ministar obrazovanja i nauke Tuzlanskog kantona dr. Elvis Baraković.

Ministar se zanimao za tok nastavnog i odgojnog procesa u Medresi i ukupnu situaciju u vezi s pandemijom COVID-19.

Direktor Medrese dr. Ahmed Hatunić izvijestio je ministra da se svi procesi u Medresi redovno odvijaju i da nema posebnih problema u vezi s pandemijom. Higijenske mjere se striktno provode, a veći broj zaposlenih je već vakcinisan, zahvaljujući čemu se broj oboljelih od ove opake bolesti kreće u simboličnim brojkama.

Kao posebnost ove školske godine, direktor Hatunić je istakao da je u njoj stupio na snagu i da se već primjenjuje novi nastavni plan i program. U njemu je povećan obim nastavnih sadržaja iz prirodno-matematičke grupe predmeta, što čini Behram-begovu medresu predvodnicom u ovom pogledu među islamskim obrazovnim ustanovama u Bosni i Hercegovini.

Ministar Baraković je istakao dobre rezultate u radu Medrese i pozvao na nastavak dobre saradnje s Ministarstvom. Zanimao se i za projekte koje je u zadnjim godinama podržala Vlada TK.

## Mevludom i bazarom obilježeno Poslanikovo rođenje

Tradicionalni ženski mevlud, koji se izvodi svake godine povodom rođenja posljednjeg Božijeg poslanika Muhammeda, a.s., proučen je u džamiji Behram-begove medrese u utorak 2.11.2021. godine.

Program se sastojao od učenja Kur'ana, mevluda, ilahija i kasida.

Kao i svake godine, organiziran je humanitarni bazar, na kojem su se prodavali kolači, slike i levhe, umjetnička djela učenika Behram-begove medrese.

Prigodno predavanje je održala profesorica bosanskog jezika u Behram-begovoj medresi Emina Hatunić. Ona se osvrnula na život i djelo posljednjeg Božijeg poslanika Muhammeda, a.s. Naročitu pažnju je posvetila osobini koja je specifična za njega, a to je dostojanstvo. U svom izlaganju naglasila je da je Poslanik bio dostojanstven

i pred neprijateljima nikada nije spuštao glavu. Muslimani i danas moraju više ličiti na svog poslanika. A dostojanstvo se najviše čuva ukoliko budemo štitili jedni druge.

Mevludu su prisustvovali i članice nekoliko ženskih udruženja iz gradova Bosne i Hercegovine: Brčkog, Lukavca, Doboj Istoka, Kalesije, Gradačca, Čelića, Tuzle, kao i profesorice, učenice, džematlijeke i mnoge prijateljice Behram-begove medrese.

### Posjeta Centru za rehabilitaciju od psihoaktivnih supstanci

U ponedjeljak 1.11.2021. godine polaznici izborne nastave pedagogije i psihologije, posjetili su Centar za rehabilitaciju i odvikavanje od psihoaktivnih supstanci u Lukavcu.

Direktor centra Mevludin Joldić upriličio je prijem za goste i zahvalio se na posjeti i podršci. Tokom posjete učenici su pogledali i kratak film o nastanku Centra, terapijama koje se provode i o drogama koje se najčešće konzumiraju. U nastavku druženja tri štićenika Centra su učenicima ispričali svoje priče o putu koji ih je doveo do svijeta droge. Štićenici su uputili i poruku da je prva psihoaktivna supstanca uvijek najopasnija, bez obzira o kojoj se vrsti radi i da nikada ne treba u lošim postupcima slijediti prijatelje. Nakon njihovih zanimljivih i poučnih priča uslijedila su i pitanja koja su postavljali učenici.

### Druženje tuzlanskih i živiničkih srednjoškolaca

U srijedu 27.10.2021. godine u Medresi je održana radionica o životu poslanika Muhammeda, a.s.

Organiziranje učeničkih radionica je uvedeno 2015. godine.

Ove godine učeničkoj radionici su prisustvovali učenici Gimnazije Meša Selimović, Gimnazije Živinice, Opće gimnazije Katoličkog školskog centra „Sveti Franjo“ Tuzla, Mješovite srednje Elektrotehničke škole, Medicinske škole, Ekonomsko-trgovinske škole i Behram-begove medrese.

Cilj ove učeničke radionice je obilježavanje rođenja Poslanika Muhammeda, a.s., te da učenici na ovakav način upoznaju ličnost Poslanika, a.s. razgovarajući o temama koje su vezane za njegov životopis. Pored toga, cilj je i učeničko međusobno upoznavanje, druženje i razmjena iskustava.

## Učenici Behram-begove medrese na protestima sa ženama Srebrenice

Na Trgu Slobode u četvrtak 11.11.2021. godine okupile su se žene Srebrenice i mirnom šetnjom podsjetile na svoju bol i dugogodišnje traganje za svojim najmilijim. Ovog jedanaestog s njima nije bila Hajra Ćatić, višegodišnja predsjednica Udruženja Žene Srebrenice, koja je preselila na Bolji svijet, a dženaza namaz joj je klanjana upravo tog dana. Ona kao i mnoge majke nisu dočekale da pronađu posmrtnu ostatku svoje djece i da ih dostojanstveno ukopaju.

Majkama Srebrenice su se ovaj put pridružili učenici i učenice četvrtog razreda Behram-begove medrese. Oni su proučili i hatmu za ubijene u Genocidu u Srebrenici, a predali su je nakon mirne protestne šetnje u Čaršijskoj džamiji.

Za ubijenim Bošnjacima u Genocidu u Srebrenici koji se desio 11.jula 1995. godine još uvijek se traga.

I sin Hajre Ćatić, Nihad Ćatić nikad nije pronađen. On je bio ratni novinar koji je svoj posljednji izvještaj poslao 11.jula. Za njega Srebreničani vele da je bio njihov glas koji je slao istinu iz opkoljene Srebrenice.

Tokom Genocida u Srebrenici ubijeno je više od 8000 bošnjačkih muškaraca i dječaka.

## Edukacija učenika prvog razreda o zaraznim bolestima

U utorak 9.11.2021. u amfiteatru Behram-begove medrese održano je predavanje učenicima prvog razreda o zaraznim bolestima. Predavanje na ovu temu održala je dr. Jasna Šadić, šef odjeljenja za epidemiologiju Doma zdravlja u Tuzli. Ista edukacija za učenice prvog razreda održana je u srijedu, 10.11.2021. godine. O zaraznim

bolestima učenicama je govorila dr. Amerlina Mehičić, načelnica službe za higijensko-epidemiološku zdravstvenu zaštitu u Domu zdravlja u Tuzli.

Ova saradnja između Behram-begove medrese i Doma zdravlja u Tuzli traje nekoliko godina.

### Završen program edukacije edukatora iz medijske pismenosti za nastavno osoblje medresa u BiH u organizaciji Uprave za vanjske poslove i dijasporu i OSCE-a

Podjelom certifikata 8. novembra u hotelu Ibis u Sarajevu za dvanaest profesora iz šest bosanskohercegovačkih medresa okončana je Edukaciju edukatora u oblasti medijske pismenosti za nastavno osoblje medresa u Bosni i Hercegovini koju je Uprava za vanjske poslove i dijasporu Rijaset Islamske zajednice u saradnji sa Upravom za nauku i obrazovanje, a uz podršku Misije OSCE-a u Bosni i Hercegovini pokrenula u martu ove godine.

Tokom šest sesija putem Zoom platforme profesori i profesorice, budući edukatori iz medijske pismenosti, su imali priliku slušati teme vezane za medijsko i digitalno opismenjavanje, te kroz interaktivne radionice razvijati vlastite vještine medijske pismenosti.

Tokom obuke oni su realizirali i ogledne radionice sa učenicima medresa uz mentorstvo trenera i predavača o čemu su razgovarali na današnjoj završnoj radionici ramotrivši dosadašnje prakse ali i planove za budući rad.

Profesori i profesorice koji su prošli sve segmente ove obuke o medijskoj pismenosti stekli su znanja i vještine koja će u okviru budućih aktivnosti u medresama koristiti u podučavanju učenika kako da kritički procjenjuju i evaluiraju medijske sadržaje, uključujući društvene mreže, te ih osnažiti i da preuzmu aktivnu ulogu u primanju i širenju činjeničnih informacija.

## Novi broj Misaka izašao iz štampe

Novi 99.broj Misaka izašao je u utorak 16.11.2021. godine. Novo uredništvo od ove školske godine sa urednicom Sumejom Muratović, zamjenicom Zulejhom Omerbašić i lektoricom Maidom Mehmedćehajić pripremlilo je nove zanimljive teme.

U ovom broju donosimo vam intervju sa novinarkom Almasom Hadžić, u rubrici Ukrasi ahlaka donosimo vam temu noćni namaz. U novoj rubrici Učenici sa drugog kontinenta predstavljamo dvije učenice koje idu u našu školu, a rođene su u Australiji i Egiptu. Istraživački rad o ponovnom povratku u školske klupe nakon online nastave i učenička zapažanja donosimo u rubrici Medresanski izazovi. U rubrici Drugi o nama o Misaku govore učenici iz osnovnih i srednjih škola iz Grada Tuzle. Reportaža o maturantskoj ekskurziji u Tursku je također u ovom broju. U rubrici Naši talenti su predstavljeni Hajrudin Vejzović, atletičar i Bakir Baković. Tu su još rubrike Sport, Sedma umjetnost, Izlog, Proza, Poezija, Ukrštenica i Vremeplov.

## Promovirane muftijine knjige

U amfiteatru naše škole, povodom obilježavanja Dana državnosti Bosne i Hercegovine, u ponedjeljak 22.11.2021.godine promovirane su dvije knjige S Ferhadijom povratak, sigurnost i opstanak i Naš Dobo, autora Edhema Čamdžića, bivšeg banjolučkog muftije.

Promotori su bili direktor Behram-begove medrese dr. Ahmed Hatunić i glavni imam Medžlisa Islamske zajednice Ključ dr. Ermin Vučkić. U svom obraćanju dotakli su se bogate biografije autora.

Njegove knjige su hronike o teškoj borbi, opstanku i dostojanstvu našeg naroda u tim područjima i nastale su na osnovu njegovih svakodnevnih bilježenja pojava, ljudi i događaja tokom njegova bogatog radnog vijeka.

Na kraju su učenici naše škole s izuzetnom pažnjom slušali autorovo izlaganje.

## Dvije aktivnosti volontera povodom Dana državnosti

Volonteri naše škole u ponedjeljak 22.11.2021.godine posjetili su Centar koraci nade u Tuzli.

Volonteri Behram-begove medrese su povodom Dana državnosti Bosne i Hercegovine izveli svečani program, koji se sastojao od izvođenja patriotskih pjesama i recitacija, te su se družili sa štíćenicima ovog Centra. Ovo je nastavak višegodišnje uspješne saradnja između naše škole i Centra.

Također, danas su uručena i novčana sredstva koja su prikupili volonteri u proteklom periodu organizujući razne humanitarne baze. Novčanu donciju dr. Mevludinu Hasanoviću, uručio je direktor Medrese Ahmed Hatunić, a prikupljen novac će se koristiti za projekat uspostave Odjela dječije i adolescentne psihijatrije na Klinici za psihijatriju Univerzitetско kliničkog centra u Tuzli.

## Obilježen Dan državnosti Bosne i Hercegovine

U utorak 23.11.2021. godine u fiskulturnoj sali naše škole izveden je svečani program koji su izveli članovi horske, dramske i recitatorske sekcije naše škole.

Bila je ovo prilika da se svi zajedno podsjetimo na našu slavnu prošlost.

Besjedu o historiji naše domovine Bosne i Hercegovine održao je profesor u Behram-begovoj medresi Fadil Alić.

Prije 78 godina održano je prvo zasjedanje Zemaljskog antifašističkog vijeća narodnog oslobođenja Bosne i Hercegovine u Mrkonjić gradu. Na ZAVNOBiH-u su donesene odluke o obnovi državnosti Bosne i Hercegovine, ali ovo je bila i konstituirajuća skupština i najviši državni organ antifašističkog pokreta u Bosni i Hercegovini tokom Drugog svjetskog rata, te se razvio kao nosilac bosanskohercegovačke državnosti.

Bosna i Hercegovina je 25.novembra 1943.godine obnovila svoju državnost koju je izgubila 1463. godine kada je potpala pod upravau Osmanske imperije.

## Uručena donacija Zavodu za odgoj i obrazovanje

Pomoćnik direktora za nastavu u Behram-begovoj medresi Fuad Imširović, pedagog naše škole Ramiz Nurikić i profesorica Ehlimana Suljić u srijedu 24.11.2021. godine posjetili su Zavod za odgoj i obrazovanje osoba sa smetnjama u psihičkom i tjelesnom razvoju u Tuzli.

Primili su ih direktorica Zavoda Selma Hodžić i pedagog Damir Muratović. Direktorica se ovom prilikom zahvalila na dugogodišnjoj saradnji koja postoji između ove dvije ustanove.

Tokom posjete donirana su novčana sredstva koja su prikupljena na prodajnim bazarima koji su organizirani u Behram-begovoj medresi povodom Mevluda, a novac je sakupljen od prodaje kolača koje pripremaju profesorice Behram-begove medrese i umjetničkih djela naših učenika.

Kako su domaćini istaknuli, novac će biti utrošen za ugradnju vrata u internatui Zavoda.

## Prodajnim bazarom obilježen Dan volontera

Međunarodni dan volontera koji se obilježava 5.decembra, u našoj školi je obilježen u ponedjeljak 6.decembra.

Tradicionalno volonteri Behram-begove medrese i ove godine su prodajom kolača, smutija, voćnih salata, mahrama, ručno izrađenog nakita profesorima, učenicima i drugom školskom osoblju uspješni skupiti novačana sredstva koja će kao i do sada biti usmjerena za one kojima je pomoć najpotrebnija.

Volonterska sekcija je jedna od najaktivnijih sekcija u našoj školi i zahvaljujući vrijednim članovima ove sekcije već nekoliko godina traje uspješna saradnja sa nekoliko ustanova na području Tuzlanskog kantona. Naši volonteri posjećuju Zavod za odgoj i obrazovanje osoba sa smetnjama u psihičkom i tjelesnom razvoju, volontiraju u biblioteci Behram-beg, također postoji i određena saradnja sa Međunarodnim forumom solidarnosti Emmaus.

Veoma često uz novčanu pomoć naši volonteri redovno posjećuju ove ustanove i održe i bogat kulturno-umjetnički program u saradnji sa horom naše škole i dramskom i recitatorskom sekcijom.



## Premijerno izvedena monodrama Emira Hadžihafizbegovića u Medresi

U četvrtak 9.12.2021. godine u Behram-begovoj medresi izvedena je tuzlanska premijera monodrame Sve je do nas.

Autor scenarija i izvođač je poznati bosanskohercegovački glumac Emir Hadžihafizbegović, Tuzlak.

Premijeri su prisustvovali učenici i profesori, te direktor Behram-begove medrese, kao i muftija tuzlanski Vahid-ef. Fazlović.

U tekstu monodrame, Hadžihafizbegović se bavi pitanjima današnjice i krizama i posrnućima kroz koja prolaze moderna društva, uključujući i bosanskohercegovačko. Alkoholizam, droga, prostitucija, kockanje i klađenje, te kamate najizraženiji su poroci koji uništavaju naše društvo.

Nakon premijere, glumac je nagrađen gromoglasnim aplauzom publike.

Nakon premijere uslijedilo je fotografiranje: svi učenici su željeli da imaju uspomenu na ovaj jedinstveni kulturni događaj i druženje s našim najpoznatijim i najnagrađivanijim glumcem.

## U Medresi obilježen Međunarodni dan arapskog jezika

Obilježavajući 18.decembar, Međunarodni dan arapskog jezika, realizirano je niz aktivnosti u našoj školi.

Profesori arapskog jezika su sa učenicima priredili kviz znanja, izložbu panoa o značaju i ljepoti arapskog jezika, izradu stikera koji sadrže osnovne informacije o značaju poznavanja arapskog jezika u životu svakog muslimana.

Najuspješniji takmičari su nagrađeni, a svi učesnici u takmičenju su dobili zahvalnice.

Arapski jezik je jedan od najrasprostranjenijih jezika i trenutno je na četvrtom mjestu na svijetu po broju govornika. Ispred se nalaze engleski, mandarinski i španski jezik. Arapskim jezikom priča oko 300 milijona ljudi širom svijeta. On je jedan od šest službenih jezika Ujedinjenih nacija.

Od semitskih jezika arapski jezik ima najrazvijeniju morfologiju i sintaksu, te vokabular. Arapski jezik se odlikuje začuđujućim bogatstvom sinonima.

Allah dž.š. je posljednju Božiju objavu Kur'an objavio i dostavio na arapskom jeziku. Ovo nam govori o vrijednosti, jačini i bogatstvu arapskog jezika. Ali i o ljubavi i naklonosti Bošnjaka prema arapskom jeziku.

## Sajam poslovnih ideja održan u Medresi

U Behram-begovoj medresi je u četvrtak 16. decembra 2021. godine održan "Sajam poslovnih ideja".

Ova aktivnost je proizašla iz projekta FUTURE ENTREPRENEURS OF THE WORLD (Budući poduzetnici svijeta), a čiji je zagovornik univerzitetski profesor Andrew Balas iz Sjedinjenih Američkih Država. Ovaj program se realizira u Bosni i Hercegovini i Rumuniji, a cilj mu je da pomogne mladima da razviju svoje poduzetničke i liderske vještine i time doprinesu boljoj budućnosti svih građana svoje države.

Učenici su od početka školske godine radili sa poslovnim ljudima iz lokalne zajednice, vlasnicima malih preduzeća, koji su im prenijeli svoja iskustva. Nakon toga su samostalno istraživali najveće poslovne mogućnosti u savremenom svijetu.

Na ovom sajmu učenici prezentiraju lokalne biznise, firme i njihove osnivače, također predstavljaju poslovni uspjeh jedne lokalne zajednice, a ovaj put su predstavili uspjeh Gračanice. Naveli su aktivnosti zbog kojih je ova lokalna zajednica ekonomski prosperitetna. Potom su prezentirali svjetske brendove i njihove osnivače.

Na koncu prezentirane su i savremene poslovne mogućnosti. Kao i drugi mladi ljudi u Evropi naši učenici su zainteresirani za ekologiju, pa su shodno tome prezentirali EU Green Deal. Zeleni plan EU podrazumijeva tranziciju ka ekološki prihvatljivoj proizvodnji energije, a ovaj koncept je i šansa za poslovni uspjeh.

Posebno zanimljiva prezentacija na ovom sajmu je NFT ili Non-fungible token (Nezamjenjivi token). Ovo je cijeli koncept

savremenih tehnologija i biznisa u cyber svijetu, a što može biti šansa za uspjeh i naših mladih ljudi.

## Podrška domu za učenike u Potočarima

U četvrtak 23.12.2021. godine voditelji i članovi sekcije „Klub humanista“ ugostilis Alemu Hodžić, koordinatoricu za razvoj i saradnju, i Mersihu Imamović, asistenticu na projektima Međunarodnog foruma solidarnosti Emmaus.

Gošće su se obratile učenicama i prenijele im informacije o učeničkom domu u Potočarima kod Srebrenice. Ovaj dom je namijenjen za djecu iz udaljenih mjesta oko Srebrenice, ali i Bratunca, Vlasenice i Zvornika. Ovo je jedinstveni smještajni kapacitet u Bosni i Hercegovini i predstavlja rješenje problema njihovog redovnog školovanja, zbog velike udaljenosti škole od pojedinih mjesta. Ovom prilikom je iz fonda „Kluba humanista“ Behram-begove medrese uručen značajan novčani iznos za nabavku opreme potrebne za rad sa djecom u ovom učeničkom domu.

Saradnja između Behram-begove medrese i Međunarodnog foruma solidarnosti Emmaus traje godinama i bilježi nekoliko realiziranih projekata.

## Završeno prvo polugodište

Nastava u prvom polugodištu u školskoj 2021/22. godini u Behram-begovoj medresi završena je u petak 31.12.2021. godine.

Nastava u drugom polugodištu počinje 17. januara 2022. godine.

Svim učenicima čestitamo završetak prvog polugodišta.

## Održan seminar u Medresi

U četvrtak 13.1.2022. godine u Behram-begovoj medresi je održan seminar za profesore.

Na temu Jačanje psiho-socijalnih kompetencija adolescenata oslabljenih online nastavom govorio je dr. Mevludin Hasanović s Klinike za psihijatriju UKC-a u Tuzli, dok je drugi predavač bio

profesor Mustafa Spahić Mujki, koji je govorio o temi Međuljudski odnosi kao temelj uspješnog odgojno-obrazovnog procesa. Seminaru je prisustvovao i muftija tuzlanski Vahid-ef.Fazlović, koji se obratio profesorima prigodnom besjedom.

Dan poslije, u petak 14.1.2022. godine, održan je seminar za osoblje u službama održavanja, higijene i tehničkih poslova Medrese. Direktor Ahmed Hatunić je govorio o temi Radna i poslovna etika, Azra Fazlović o temi Žena muslimanka – fetve i propisi, a Bekir Šabić o Odgojnoj dimenziji islamskih šartova.

### Počelo drugo polugodište u Behram-begovoj medresi

Nastava u drugom polugodištu za školsku 2021/22. godinu u Behram-begovoj medresi počela je u ponedjeljak 17.1.2022. godine. Učenici su bili na zimskom raspustu od 31.12.2021. godine.

Učenici ponovo odlaze kućama 31. marta povodom mjeseca ramazana koji ove godine počinje 2.4.2022. godine i vraćaju se u školske klupe 5. maja 2022. godine.

Maturanti sa svojim srednjoškolskim školovanjem završavaju 25. maja 2022. godine.

A za učenike prvog, drugog i trećeg razreda kraj nastave je 22. juna 2022. godine.

### Prvi u vrednovanju srednjih škola u Tuzlanskom kantonu

Pedagoški zavod Tuzlanskog kantona je na svojoj web stranici objavio listu najboljih srednjih škola na području Tuzlanskog kantona u školskoj 2020/21. godini.

U rangui svih srednjih škola Behram-begova medresa je zauzela prvo mjesto, s ukupno ostvarenih 4.513 bodova. Na drugom mjestu je Mješovita srednja škola iz Gračanice, s osvojenih 3.754,45 bodova, a treća je Richmond Park International Secondary school iz Tuzle.

I u kategoriji gimnazija prvo mjesto je zauzela Behram-begova medresa. Na drugom mjestu je Richmond Park International Secondary School, a na trećem Gimnazija Meša Selimović iz Tuzle.

Ovu laskavu titulu Behram-begova medresa je ponijela jedanaesti put zaredom. U posljednjih 18 godina tri puta nije zauzela prvo mjesto, nego drugo.

Vrednovanje svih srednjih škola na području Tuzlanskog kantona vrši Pedagoški zavod TK po precizno određenom instrumentariju. U njega su uključeni svi elementi funkcioniranja srednjih škola na ovome području.

### Doktorirao Ahmed Omerović

U srijedu 26.1.2022. godine na Pravnom fakultetu Univerziteta u Tuzli doktorsku disertaciju je odbranio Ahmed Omerović.

Tema njegovog rada je: Međunarodno-pravni politički aspekti doprinosa Republike Austrije afirmaciji Bosne i Hercegovine u međunarodnoj zajednici u periodu od 1992. do 1995. godine.

Mentor profesoru Ahmedu Omeroviću i član komisije bila je prof.dr. Dženeta Omerdić, a komisiju još sačinjavali i prof. dr. Amir Karić i prof. dr. Zlatan Begić.

Dr.Ahmed Omerović je profesor demokratije i ljudskih prava u Behram-begovoj medresi.

Rođen je u Bratuncu, a završio je Behram-begovu medresu u Tuzli. Nakon toga upisuje Fakultet političkih nauka u Sarajevu. Svoj magistarski rad i doktorsku disertaciju odbranio je na Pravnom fakultetu Univerziteta u Tuzli. Oženjen je i otac dva sina.

### Svjetski dan hidžaba obilježen u Medresi

U Medresi je u utorak 1.2.2022. godine, povodom Svjetskog dana hidžaba, održan bogat kulturni program.

Učenice četvrtog razreda su izvele program koji se sastojao od izvođenja ilahija, čitanja literarnih radova o hidžabu, modne revije, a pripremljen je i kviz znanja u kojem su učestvovala učenice iz prvog, drugog i trećeg razreda. Svim učesnicama su dodijeljene prigodne nagrade.

U programu su korišteni i videozapisi naših uspješnih alumnistkinja koje su sada ljekari, inženjeri, novinari. One su u svom obraćanju istakle prednost nošenja mahrame i svoje iskustvo sa hidžabom.

Učenice iz prvog i četvrtog razreda su kroz svoje obraćanje objasnile zašto nose mahramu i šta ona za njih predstavlja.

Svjetski Dan hidžaba se obilježava prvog februara od 2013.godine. Ustanovljen je na prijedlog studentice Nazme Khan iz New Yorka. Od tada na ovaj datum žene širom svijeta objavljuju svoje fotografije, videozapise i mišljenja pričajući svoja iskustva o hidžabu. Akcija obilježavanja Svjetskog dana hidžaba dobila je globalne razmjere i već se nekoliko godina obilježava i u našoj zemlji.

### Muftija tuzlanski na sjednici Nastavničkog vijeća

Sjednici Nastavničkog vijeća Behram-begove medrese koja je održana u srijedu 2.februara 2022. godine prisustvovao je muftija tuzlanski Vahid-ef. Fazlović.

Muftija Fazlović je čestitao Behram-begovoj medresi na uspjehu postignutom na vrednovanju rada srednjih škola na području Tuzlanskog kantona koje provodi Pedagoški zavod Tuzlanskog kantona.

Behram-begova medresa u Tuzli i ove godine je ponijela titulu najbolje srednje škole na području Tuzlanskog kantona u školskoj 2020/21. godini. U rangu svih srednjih škola i u rangu gimnazija Behram-begova medresa je zauzela prvo mjesto. Četrnaesti je put ponijela ovu titulu.

### Omerbašić nova hafiza Behram-begove medrese

U nedjelju 13.2.2022. godine u Sarajevu je svoj hafiski ispit okončala maturantica naše Medrese Zulejha Omerbašić.

Ona je pred Komisijom za polaganje hifza proučila posljednje stranice Kur'ana. Ispit je trajao od 30. januara ove godine.

Članovi Komisije su bili kurra hafiz Dževad Šošić, hafiz Dževad Hrvačić, hafiz Muhamed Čajlaković i hafiz Abdul Aziz Drkić.

Muhafiz ovog hafizi je bio hafiz Abdulah Kapo, profesor u Behram-begovoj medresi.

Zulejha Omerbašić je iz Lukavca. Učenica je četvrtog razreda Behram-begove medrese i tokom svog školovanja je bila superodlična učenica.

Hifz je završila za dvije i po godine, a počela ga je učiti 2019. godine.

## Izašao 100. Misak

Stoti broj Misaka iz štampe je izašao u ponedjeljak 14. februara 2022. godine. U ovom jubilarnom broju su članovi redakcije došli do izjava mnogih poznatih ličnosti iz svijeta nauke, sporta, novinarstva, koji su uputili iskrene čestitke povodom ovog značajnog jubileja.

Ovaj broj je drukčiji od prethodnih, jer je svečan i prilika je takva. Na njegovim stranicama je intervju s direktorom Behram-begove medrese Ahmedom Hatunićem, dosadašnjim koordinadorima lista Sevretom Mehmedčehajićem, Amirom Karićem, Mensurom Husićem, Admirom Muratovićem i Senadom Mehmedčehajić.

Također su novinari Misaka razgovarali s urednicom drugog broja lista Merjemom Muratović-Šuta, s trećim urednikom Mirzom Sarajkićem, sa Sumejom Okić koja je bila na čelu redakcije koja je izdala šest brojeva u svom mandatu...

Mnogi poznati su čestitali ovaj jubilej: poznati interpretatori pop-muzike i ilahija Armin Muzaferija, izvođači ilahija hafiz Ahmed Alili, Ibrahim Bilčević, Šejma Mehić, novinarka Almasa Lazović, Šejla Cocalić, Miralem Dautović, Azur Delić, književnica Nura Bazdulj-Hubijar, glavni i odgovorni urednik BIRTV-a Kasim Softić...

Izuzetan doprinos u tehničkom osmišljavanju naslovnica Misaka, ali i općenito lista dao je profesor informatike u našoj školi Elvedin Kozarević, s kojim je obavljen intervju.

Tu je još dosta zanimljivih sadržaja na 100 strana Misaka.

Stoti broj Misaka možete pogledati online na našoj veb stranici.

## Izložba o bosanskom jeziku

Povodom Međunarodnog dana maternjeg jezika u sklopu manifestacije Njeguimo pisanu riječ u holu Filozofskog fakulteta Univerziteta u Tuzli u ponedjeljak 21.2.2022. godine otvorena je izložba Stara i rijetka periodika. Grupa naših učenika u pratnji profesora bosanskog jezika u Behram-begovoj medresi Alija Hasanovića bila je na otvorenju izložbe, čiji je autor Jusuf Džafić.

Učenici su imali priliku vidjeti preko trideset starih časopisa koji se inače čuvaju u biblioteci Behram-beg, unutar izuzetno bogate Zbirke periodičnih izdanja biblioteke. Neki od njih su stari preko stotinu godina.

Posjetioci će moći da pogledaju izložbu do 23. februara.

Organizatori izložbe su Specijalna biblioteka Behram-beg i Odsjek za bosanski jezik i književnost Filozofskog fakulteta u Tuzli.

## Izvedba Hasanaginice u Medresi

U utorak 22.2.2022. godine maturanti Medrese premijerno su izveli dramu Hasanaginica.

U glumačkoj postavci su bili: Zejneba Deari u ulozi Hasanaginice, Ismar Sarajčić u ulozi Hasanage, Ramiza Jusupović u ulozi svekrve, Haris Redžić u ulozi brata Pintorovića, Emina Mumić kao majka Hasanaginicina, Ahmedina Ramić u ulozi zaove, Denisa Topčagić kao najstarija kćerka Sultanija, Kasim Alispahić, Said Mujić, Ahmed Mešanović, Muhamed Mehić, Hilmo Tulumović, Harun Golać, Ibrahim Mujdžić, Zejneba Čeman i Tarik Kusur.

Režiju potpisuje profesorica bosanskog jezika u Behram-begovoj medresi Emina Hatunić. Ona je s njima radila i pripremala ih za ovu zahtjevnu izvedbu. Nakon dugo priprema ova drama je izvedena na oduševljenje publike, a glumci su nakon izvođenja predstave nagrađeni gromoglasnim aplauzom.

U ovoj predstavi se radi o dramatizaciji narodne balade koja je pod istim imenom poznata i u svijetu. Nju je zabilježio i od zaborava otrgnuo italijanski putopisac Alberto Fortis 1774. godine, a koju je čuveni Goethe još daleke 1775. godine preveo na njemački jezik i



ostao zatečen ljepotom i skladnošću teksta. To su uradili i Walter Scott (1789.) škotski pisac koji ju je preveo na engleski jezik, A.S. Puškin (1835.) čuveni ruski pjesnik, Adam Mickiewicz (1841.) poznati poljski pjesnik i drugi.

Za Hasanaginicu se može reći da je jedna od naših najljepših balada.

## Priznanje za Behram-begovu medresu

U utorak 22.2.2022. godine u Pedagoškom zavodu Tuzlanskog kantona organizovan je prijem za prvoplasirane škole sa područja Tuzlanskog kantona, koje su prema vrednovanju za 2020/21. školsku godinu ostvarile najbolje rezultate.

Direktor Pedagoškog zavoda Tuzlanskog kantona Nikola Čiča uručio je priznanje pomoćniku direktora Behram-begove medrese Fuadu Imširoviću za osvojeno prvo mjesto u rangu svih srednjih škola i gimnazija.

Behram-begova medresa je prema vrednovanju Pedagoškog zavoda za 2020/21. školsku godinu osvojila prvo mjesto u rangu svih srednjih škola sa osvojenih 4.513 bodova. I u kategoriji gimnazija Medresa je bila najbolja škola.

Ovu titulu Behram-begova medresa je ponijela jedanaesti put zaredom.

Vrednovanje svih srednjih škola na području Tuzlanskog kantona vrši Pedagoški zavod TK po precizno utvrđenim instrumentariju.

## Obilježen Dan nezavisnosti Bosne i Hercegovine

Program povodom Dana nezavisnosti Bosne i Hercegovine održan je u četvrtak 24.2.2022. godine. Program se sastojao od izvođenja ilahija i kasida, sevdalinki, recitacija. Predavač je bio profesor sa Filozofskog fakulteta dr. Midhat Čušević. Podsjetio je na pet temelja: kontinuitet, identitet, subjektivitet, samostid i ponos koji se moraju čuvati. U svom obraćanju je naglasio jedinstvenost naše domovine. Rijeka ima naziv Bosna, teritorija nosi naziv Bosna i država se zove Bosna.

Proглаšeni su i pobjednici konkursa za najbolji kratki film i digitalnu fotografiju. Tema je bila Svaka tuđa zemlja tuga je golema. Prvo mjesto za najbolji kratki film osvojila je Temra Halilović, učenica prvog razreda, drugo mjesto osvojile su Elma Polutak i Maida Mehmedćehajić, učenice četvrtog razreda i treće mjesto osvojili su Medina Hatunić učenica prvog razreda i Muhamed Hatunić učenik trećeg razreda. Radovi učenica Nadije Hodžić i Enise Memišević nagrađeni su u kategoriji digitalne fotografije.

## Ptice bijele promovisane u Medresi

U srijedu 23.2.2022.godine u Behram-begovoj medresi je povodom Dana nezavisnosti Bosne i Hercegovine održana promocija knjige Ptice bijele, autorice Naze Mehmedović-Salkić.

Promotori su bili profesorica i književnica Esmā Kapetanović, profesorica bosanskog jezika u Behram-begovoj medresi Emina Hatunić i profesor bosanskog jezika Osman Halilović, te autorica Naza Mehmedović-Salkić. Promociji je prisustvovao i muftija tuzlanski Vahid-ef. Fazlović, koji se obratio na kraju promocije. Mnoga lica iz kulturnog, naučnog i političkog miljea Tuzle prisustvovala su promociji: direktor Behram-begove medrese Ahmed Hatunić, direktor biblioteke Behram-beg Admir Muratović, direktor Instituta za društvena i religijska istraživanja Šefko Sulejmanović, dekanesa Filozofskog fakulteta dr.sc. Nihada Delibegović Džanić, novinarka Almasa Hadžić.

Knjiga Ptice bijele izašla je iz štampe krajem 2020.godine i doživjela je nekoliko promocija u Bosni i Hercegovini i Sandžaku. Govori o snazi bosanske žene i o njejoj odlučnosti da nastavi živjeti i boriti se bez obzira na gubitak voljenih osoba. Cilj autorice je kako je kazala bio da sačuva od zaborava trenutke sreće, boli, ljubavi i patnje, te sjećanje na jedno okrutno vrijeme i ljude iz svog okruženja i podijeliti istinu o tom vremenu u knjizi.

Organizatori promocije su Behram-begova medresa i biblioteka Behram-beg u Tuzli.

## Dan vakifa: Neodvojivi dio Medresine porodice

Dan vakifa u Bosni i Hercegovini obilježava se 26. redžepa, što ove godine pada 27. februara. Cilj je podsjetiti se na sve vakife u Bosni i Hercegovini.

Na ovaj dan, Gazi Husrev-beg potpisao je svoje vakufname. Mnogi su načini uvakufljenja imovine, a ponajbolji primjer su medrese koje svojim radom privlače sve više vakifa.

U svakom infrastrukturnom projektu koji je realizirala Behram-begova medresa učestvovali su njeni vakifi, potvrđuje direktor dr. Ahmed Hatunić, i bila je to uvijek značajna i zapažena podrška. Sa olakšanjem su ulazili u zahtjevne projekte i poslove imajući u vidu postojanje velikog broja vakifa kao i određenog broja vakifa-utemeljitelja medrese koji su izdvojili velike iznose u izgradnju određenih dijelova kompleksa.

- U sklopu oktobarskih dana Behram-begove medrese u Tuzli ustanovljen je Dan vakifa kada se oni na posebnoj svečanosti i programu okupe i bivaju informirani o našim aktivnostima i planovima. Aktivnosti oko uvakufljenja traju tokom čitave godine i nisu striktno vezani za određene dane što je činjenica koja u nama gradi nadu i uvjerenje da ćemo svi zajedno biti u stanju završiti ono što od projekata dobra započnemo - kazao je za Preporod.info direktor najuspješnije škole na području Tuzlanskog kantona dr. Hatunić.

### Trajno dobro

- Vakifi, naglasio je dr. Hatunić, kao prijatelji i dobročinitelji Behram-begove medrese su neodvojivi dio njenog kolektiva i predstavljaju zajedno sa učenicima, profesorima i diplomantima „veliku porodicu Behram-begove medrese“ na koju se ona u svakome momentu može osloniti. Ostvarene veza su iz dana u dan sve jače i postojanije.

Univerzalni i najveći motiv za uvakufljenje je postizanje Božijeg zadovoljstva i želja da se materijalna dobra ovoga svijeta pretvore u trajne vrijednosti. Drugim riječima kazano, jedini način da se obo-svjetska prolazna materijalna dobra transferišu na drugi svijet i na

taj način postanu trajna jeste davanje na putu dobra, putem zekata, sadake, uvakufljenja, humanitarnih aktivnosti... To je najveći motiv ulaganja materijalnih dobara na putu dobra, od kojih je uvakufljenje jedna od najboljih formi - ističe dr. Hatunić.

Bez tog motiva, nastavlja direktor Hatunić, uvakufljenje bi bilo nezamislivo i potpuno sporedno u životu ljudi. Međutim, čvrsto uvjerenje o mogućnosti transfera materijalnih vrijednosti u vječnost uz svijest da je ovosvjetsko korištenje vakufa od strane ljudi do kraja svijeta nešto najveličanstvenije u aspektima namjene nekretina i pokretnih dobara, čine vakuf stalno aktualnim iz generacije u generaciju našega naroda.

- Behram-begova medresa okuplja svoje vakife, prezentira im urađene poslove i projekte nastojeći ih vezati za sebe kao članove jedne velike porodice gradeći uvjerenje i svijest da ona pripada svima nama, kćerima i sinovima našega naroda ovoga i svakoga narednoga vremena, do kraja svijeta. Kompleks Medrese nastojimo održavati na način da bude dostojan primjer organizacije, reda, rada i urednosti bilo kome ko dođe u pohode ili sarađuje sa njenim učenicima ili profesorima - istaknuo je direktor Hatunić.

Prema njegovom mišljenju nezamjenjivu ulogu u usmjeravanju vakifa i dobročinitelja imaju organi Islamske zajednice, od džemata, medžlisa, Muftijstva i Rijaseta sa svim njihovim autoritetima koji su i sami veoma često vakifi Behram-begove medrese.

### 700.000 KM ulaganja u 2021. godini

Medresa „Osman-ef. Redžović“ u Visokom kao i većina drugih medresa ima status javne ustanove i velikim dijelom se finansira iz budžeta Zeničko-dobojskog kantona. Međutim, za potpunu realizaciju njihovih aktivnosti, ali i razvojne projekte koji se svake godine realiziraju potrebno je mnogo više. To mnogo više, prema riječima Dženana Rezakovića, pomoćnika direktora za nastavu, dolazi sa različitih izvora i od posve različitih ljudi.

- Prosto je nevjerojatno sa kakvim smo se sve pričama susretali tokom prethodne tri godine od kada je uvakufljenje intenzivirano. Od običnih ljudi, penzionera, pa do studenata i privrednika,

muškaraca i žena. Svoja sredstva su uvakufljavali roditelji za svoju djecu, djeca za roditelje, supružnici jedni za druge, braća i sestre jedni za druge, zetovi za punčeve i punice itd. Vakuf Medrese u Visokom postaje vakuf bosanskohercegovačkog naroda i prerasta u nepresušnu rijeku koja iz dana u dan raste i razvija se. Bez tih sredstava ovako rapidan rast i razvoj Medrese ne bi bio moguć. Samo u prošloj, 2021. godini u razvoj Medrese uloženo je preko 700.000 KM. Profesor Džemal Salihspahić bi kazao da je to „dobra voda s potočićima“ - kazao je za naš portal Rezaković.

Svi značajni projekti Medrese, naglasio je Rezaković, velikim dijelom realizirani su sredstvima vakifa, od vanjskog sportskog terena, preko vanjskog uređenja Kampusa do proširenja školske zgrade i đačkog doma što je posljednji realiziran projekat.

- Ovim projektom Medresa je stekla sve uvjete da u junu primi nova tri odjeljenja učenika i na taj način zacementira status javne ustanove. Međutim, moramo priznati da je, ipak puno veći posao od pronalaženja sredstava bio proizvesti potrebu za proširenjem u vremenu jedne vrlo nepovoljne demografske slike u Bosni i Hercegovini. Hvala Bogu, interes za Medresom raste i mi svake godine imamo mnogo više kandidata na konkursu za upis nego što ih upišemo - istaknuo je Rezaković.

On govori da oni koji prate rad Medrese mogu primjetiti da nigdje nema poziva za pomoć niti da na nekom promotivnom materijalu piše broj računa na koji se može uplatiti.

- Mi se lijepo i uljudno zahvalimo svima koji nam pomognu i činiimo dove za njih i za njihove porodice. Dakle, ti ljudi sami dođu u Medresu i na to smo posebno ponosni. U svakom trenutku vide da sredstva koja su oni donirali Medresi bivaju planski uložena i kada god dođu uoče razliku po metodi spojenih posuda, ono što su danas uložili u Medresu već sutra mogu doći i vidjeti. Sigurno je to jedan od motiva, da se skoro svaki dan može pratiti rast i razvoj Medrese. Nemaju naši ljudi problem sa tim da dio svog imetka podijele na Allahovom putu, samo žele vidjeti u šta su uložili - naveo je Rezaković.

Posebno su ponosni na vakife alumniste. Do danas se trinaest generacija maturanata našlo među vakifima Medrese. Trend generacijskog vakufljenja ponovo je pokrenula Šesnaesta generacija

maturanata koja je imala simboličan cilj, kao generacija postati 500. jubilarni vakif Medrese.

- To su i ostvarili početkom 2020. godine, kada su pored uplate za vakufnamu doznali i određena sredstva u Fond za stipendiranje učenika. Taj trend je potom nastavila druga generacija, i to u februaru prošle godine, a zatim su i ostale generacije krenule njihovim stopama. Ono što je posebno u priči o alumnistima i učenicima vakifima jeste sigurno to da su naši ovogodišnji maturanti postali vakifi. Naime, oni su prošle godine nakon povratka u školske klupe poslije ramazanske prakse odlučili dio svojih "plata" izdvojiti u ovu svrhu i postati vakifi - kazao je o akcijama medresinih učenika Rezaković.

### Novi projekti

I vakifi Behram-begove medrese, u većoj ili manjoj mjeri učestvuju u svim značajnijim projektima od renoviranja prostora do projekata proširenja, dogradnje, nadgradnje ili izgradnje potpuno novih i samostalnih objekata, ali i onih koji stipendiraju određeni broj učenika.

- Već smo započeli sa pripremama za izgradnju nove zgrade, Edukativno-poslovnog objekta Behram-begove medrese uz Rudarsku ulicu, što je nastavak prve faze već postojećeg vakufsko-edukativnog objekta. Već su prvi vakifi-dobročinitelji našega naroda, i prije formalnog početka bilo kakvih radova, izdvojili svoja značajna sredstva u izradnju objekta koji će nam još više pomoći u radu sa hafizima, u vanastavnim aktivnostima, učenju stranih jezika, kabinetnoj nastavi i drugim raznorodnim aktivnostima Behram-begove medrese. Poslovni dio objekta bit će vakuf budućnosti koji će redovno podržavati i finansirati edukativne aktivnosti i odgojni rad, praveći od vakufa i obrazovanja jedinstvenu cjelinu koja daje trajne rezultate - poručio je na kraju direktor Hatunić.

## Novi vakif Behram-begove medrese

U petak 4. marta 2022. godine, značajna novčana sredstva za izgradnju nove zgrade Behram-begove medrese uvakufio je Nail Šećkanović.

Tim povodom muftija tuzlanski Vahid-ef. Fazlović primio je vakifa Šećkanovića, te mu se zahvalio na odluci da bude vakif naše Medrese. Istakao je značaj vakifa i važnost podrške koju kontinuirano pružaju Behram-begovoj medresi.

Susretu su prisustvovali direktor Medrese dr. Ahmed Hatunić i hafiz Merim-ef. Đulović, džematski imam vakifa Šećkanovića.

Direktor Hatunić je kazao da su u toku pripreme za početak izgradnju nove zgrade Behram-begove medrese. Ovaj novi objekt u kompleksu škole bit će posebno značajan za učenje hifza i rad s hafizima.

Vakif Nail Šećkanović porijeklom je iz Čelića. Obavljao je funkciju ministra prometa i komunikacija Federacije Bosne i Hercegovine, te je bio direktor više firmi. Vrijedno i nesebično podržava aktivnosti džemata u njegovom rodnom mjestu u Čeliću, te džemat Gazi Turali-begove džamije u Tuzli gdje danas živi.

## Članovi Misaka na prijemu kod muftije tuzlanskog i direktora Medrese

U petak 4.3.2022. godine članovi redakcije Misaka bili su na susretu s muftijom tuzlanskim Vahid-ef. Fazlovićem. Prijemu je prisustvovao i direktor Behram-begove medrese Ahmed Hatunić.

Muftija Fazlović se u svom obraćanju prisjetio davne 1997. godine kada je izašao prvi broj Misaka. Pohvalio je sadržaj jubilarnog broja kao i pristup u realizaciji tema.

Zadržao se na kontinuitetu i bitnosti podsjećanja na sve one koji su u prethodnih 25 godina dali svoj doprinos u izlaženju lista.

Na prijemu su se obratile i koordinator školskog lista Misak Senada Mehmedćehajić i urednica Sumeja Muratović.

Muftija je za dvadeset članova Misaka priredio i prigodne poklone.

U utorak 8.3.2022. godine redakciju Misaka primio je i direktor Behram-begove medrese Ahmed Hatunić. On je u svom obraćanju podijelio radost zbog izlaska stotog broja Misaka. Podsjetio je na važnost koju ima pisana riječ. Također je u drugom dijelu prijema razgovarano o prijedlozima za unapređenje rada Misaka.

Misak je list učenika Behram-begove medrese koji izlazi u kontinuitetu već 25 godina i ove sedmice prigodnim programom Brojati do stotinu obilježava izlazak iz štampe stotog broja.

### Ugrađena vrata u internatu Zavoda

Na humanitarnom bazaru koji je organizovan tokom mevluda u novembru 2021. godine, prikupljen je novac , koji je usmjeren za nabavku i ugradnju vrata koja se nalaze u internatu Zavoda za odgoj i obrazovanje osoba sa smetnjama u psihičkom i tjelesnom razvoju u Tuzli.

Ta vrata su ugrađena i u funkciji su.

Saradnja sa našim prijateljima iz Zavoda traje godinama, a uz saradnju kroz volontiranje naših učenika ovo je samo nastavak jednog lijepog prijateljstva između dvije ustanove.

### Održan program "Brojati do stotinu"

Svečanost na kojoj je obilježeno štampanje stotog broja Misaka održana je u četvrtak 10. marta ove godine. Program pod nazivom Brojati do stotinu sastojao se od muzičkih numera, podsjećanja na odlomke iz prvog broja Misaka, dodjele zahvalnica i obraćanja.

U programu je svoj premijerni nastup u ovoj godini imala učenička instrumentalna grupa, koja je, zajedno s horskom grupom, maestralno izvela dvije cover izvedbe pjesama Dine Merlina i Harija Mata Harija. Svoj premijerni nastup na klaviru imao je i učenik II razreda Jusuf Mehmedčehajić.

Tokom programa prikazan je kratki dokumentarni film, koji je režirala i snimila ekipa redakcije Misaka koja je radila na izdavanju 100. broja.



Zahvalnice su dodijeljene medijskim kućama s kojima je Misak saradivao u proteklih 25 godina: Radio televiziji Tuzlanskog kantona, televiziji Hayat i Media centru Islamske zajednice u Bosni i Hercegovini. Za saradnju na popularizacije Misaka u osnovnim i srednjim školama zahvalnice su dodijeljene vjeroučiteljima Rahimi Alibegović, Sumeji Karasalihović, Edini Suljić, Izudinu Smajiću i Džemalu Imamoviću. Zahvalnica za dizajnersku i tehničku podršku dodijeljena je Elvedinu Kozareviću, profesoru informatike u našoj školi, a štampariji Off-Set dodijeljena je zahvalnica za dugogodišnju saradnju.

Na svečanosti se obratio direktor Behram-begove medrese Ahmed Hatunić. Istakao je važnost novinarske sekcije koja postoji 25 godina i u kojoj se svake godine okuplja veliki broj učenika.

Svečanosti su prisustvovali brojni prijatelji Misaka, koordinatori, profesori, vjeroučitelji, učenici iz osnovne škole Tušanj, bivši članovi redakcije...

Prije svečanosti je otvorena izložba likovnih radova učenika Medrese. Radovi su nastali pod mentorstvom likovnog umjetnika Fikreta Jahića Vršanina.

Ove svečanosti su dobro medijski propraćene.

## Poznati alim Al-Zebibi posjetio Medresu

U Behram-begovoj medresi je 11.3.2022. godine boravio šejh Sulejman Suhejl Al-Zebibi, profesor islamskih nauka iz Damaska. On se obratio Nastavničkom vijeću i podsjetio je na temu koja je zanemarena i o kojoj se ne priča puno, o kolektivnoj odgovornosti-farzu kifaje.

On smatra da je stanje u ummetu upravo ovako zbog neodgovornosti prema preuzetim obavezama.

U drugom dijelu druženja sa poznatim alimom vođena je diskusija.

Sulejman Suhejl Al-Zebibi je obrazovanje sticao na Institutu Feth i Univerzitetu Azhar, a postdiplomske studije je završio u Egiptu i Sudanu. Predaje tefsir, fikh i arapski jezik.

## Anis Subašić postao hafiz

U subotu 12.3.2022. godine pred Komisijom za polaganje hifza Rijaseta Islamske zajednice u Bosni i Hercegovini posljednje ajete napamet je proučio Anis Subašić iz Tešnja i tako stekao zvanje hafiza Kur'ana Časnog. On je 87 hafiz naše škole.

Muhafiz mu je bio hafiz Nedžad Vehabović, profesor u Behram-begovoj medresi.

Anis Subašić je završio Behram-begovu medresu u Tuzli 2021. godine kao učenik 345. generacije. Ova generacija je poznata po velikom broju hafiza. Njih 11 je postalo čuvarima božije knjige, četiri učenice i sedam učenika.

Rođen je u Zenici 2002. godine od majke Medine i oca Adisa. Student je prve godine Fakulteta islamskih nauka u Sarajevu.

## Prikazan film "U sjeni minareta"

U Behram-begovoj medresi je u utorak 15.3.2022. godine premijerno prikazan dokumentarni film U sjeni minareta (In the shadow of minarets), autora Hasana Hasanovića i Omera Hasanovića.

U ovom filmu se tematizira vjerski život muslimana u UN sigurnoj zoni Srebrenica i sistematsko ubijanje imama u njoj, naročito nakon pada Srebrenice. Iz filma je vidljivo da je na tom području bio organiziran vrlo živ vjerski život.

Jedan od preživjelih imama Mevludin-ef. Hrnjić, i sam akter tih događaja i ovog filma, kazao je u svom obraćanju nakon projekcije da je od 40 imama u Srebrenici njih 14 ostalo živo, a ostali su mučki ubijeni u Genocidu.

Jedan od koautora filma Hasan Hasanović obratio se publici i podsjetio na važnost dokumentiranja i obznanjivanja priča preživjelih u Agresiji na Bosnu i Hercegovinu.

Projekciji filma su prisustvovali muftija tuzlanski Vahid-ef. Fazlović, premijer Tuzlanskog kantona Irfan Halilagić, direktor Behram-begove medrese Ahmed Hatunić, direktor instituta za društvena i religijska istraživanja Šefko Sulejmanović, direktor Biblioteke

Behram-beg, glavni imami nekoliko medžlisa Islamske zajednice, brojni imami, gosti, profesori Medrese i učenici.

Organizatori projekcije su Muftijstvo tuzlansko i Memorijalni centar Srebrenica-Potočari.

## Zulejhi Omerbašić proučena hafiska dova

U srijedu, 16. marta 2022. godine, proučena je hafiska dova Zulejhi Omerbašić, učenici četvrtog razreda Behram-begove medrese. Zulejha Omerbašić je 86. hafiz naše škole. Posljednje ajete je proučila pred Komisijom za hifz Rijasetu Islamske zajednice u Bosni i Hercegovini u periodu od 30. januara do 13. februara 2022. godine. Muhaffiz joj je bio hafiz Abdullah Kapo, a hifz je počela učiti u prvom razredu.

Dovi su prisustvovali muftija tuzlanski Vahid-ef. Fazlović, direktor Behram-begove medrese u Tuzli Ahmed-ef. Hatunić, direktor Karađoz-begove medrese hafiz Aid Tulek, docent na Fakultetu islamskih nauka Univerziteta u Sarajevu dr. Kenan Musić, rukovodilac za srednjoškolsko obrazovanje u Upravi za nauku i obrazovanje Rijasetu Islamske zajednice u Bosni i Hercegovini Seid Eminović, potpredsjednik Sabora islamske zajednice dr. sc. Mirza Šabić, te mnogobrojni hafizi, glavni imami, imami, profesori, rodbina, prijatelji.

Gostima su se prigodnim riječima obratili muftija tuzlanski Vahid Fazlović i hafiz Aid-ef. Tulek. Diplomom u ime Rijasetu Islamske zajednice u Bosni i Hercegovini hafizi Zulejhi Omerbašić je uručio hafiz Aid Tulek.

Zulejha Omerbašić je iz Lukavca, od majke Emine i oca Nermina. Učenica je četvrtog razreda i uz obaveze koje zahtijeva učenje hifza ona je i odlična učenica.

## Dani porodičnih vrijednosti: Sijelo kao dio tradicije Bošnjaka

Petnaesti Dani porodičnih vrijednosti održani su u četvrtak 24.3.2022. godine u Bosanskom kulturnom centru u Tuzli.

U programu su učestvovala horska, dramska i recitatorska sekcija. Učili su odlomke iz Kur'ana, a glumci su izveli i kraći dramski prikaz. Program se sastojao od izvođenja ilahija, kasida, poezije, proze, obraćanja.

Posebnost ovog programa je dolazak učenika iz Zavoda za odgoj i obrazovanje, koji su zajedno s horom Behram-begove medrese izveli kasidu Ramazan. Također je upriličena i prodajna izložba kaligrafskih i umjetničkih radova.

Manifestaciji je prisustvovao muftija tuzlanski Vahid-ef. Fazlović, direktor Behram-begove medrese Ahmed Hatunić, Seid Eminović šef Odjela za obrazovanje i nauku Rijaseta Islamske zajednice u Bosni i Hercegovini i mnoge članice raznih udruženja sa područja Muftiluka tuzlanskog iz Janje, Bijeljine, Banovića, Modriče, Kalesije i Lukavca, te brojni gosti i prijatelji Behram-begove medrese.

Tema ovogodišnjeg programa bila je sijelo i dolazak ramazana.

## Održan seminar o sigurnosti na internetu

Edukacija profesora medresa Islamske zajednice u Bosni i Hercegovini o sigurnosti na internetu održana je 21. i 22. 3. 2022. godine u Sarajevu.

Predavač je bila Amela Efendić, koja se osvrnula na nekoliko najznačajnijih tema koje govore o sigurnosti na internetu, te je iznijela statističke podatke o brojnosti korisnika interneta i mobitela u Bosni i Hercegovini i u svijetu. Nakon toga uslijedilo je upoznavanje i razumijevanje pravnog okvira i opasnosti koje postoje u digitalnom okruženju.

Obuka je održana za dvanaest profesora i odgajatelja iz šest medresa koji su već prošli obuku iz medijske pismenosti.

Amela Efendić je stručni savjetnik u organizaciji Međunarodni forum solidarnosti-EMMAUS U Sarajevu i osnivač je Centra za sigurniji internet u Bosni i Hercegovini i Evropskog resornog centra za prevenciju zlostavljanja djece na internetu i drugih oblika eksploatacije.

Organizator seminara je Uprava za vanjske poslove i dijasporu Rijaseta Islamske zajednice u Bosni i Hercegovini, Uprava za nauku i obrazovanje i OSCE u Bosni i Hercegovini.

## Novčana donacija uručena udruženju PIPOL

Vijeće učenika Behram-begove medrese je zajedno sa udruženjem PIPOL Tuzla (Udruženje porodica i prijatelja djece oboljele i izliječene od leukemije i drugih malignih bolesti) provelo akciju kupovine maski sa logom Udruženja. Učenici i učenice Medrese kupili su 198 maski, te su na taj način pomogli rad ovog Udruženja.

Vrijednu donaciju u iznosu od 990 maraka predstavnicima Udruženja PIPOL uručio je Muhamed Dedić, predsjednik Vijeća učenika.

Ovo je samo još jedna uspješna akcija koju je Behram-begova medresa organizovala, a sredstva namijenila ovom Udruženju.

## Prezentacija o uticaju društvenih mreža

Maturanti naše škole su u utorak 22.3.2022. godine pripremili prezentaciju na temu Uticaj društvenih mreža na adolescente.

Osvrnuli su se na nekoliko aspekata korištenja interneta i preporučili su nekoliko stranica i osoba koje bi učenici trebali pratiti na društvenim mrežama. Tokom pripreme prezentacije proveli su anketu, a pitanja su se odnosila na osobe i stranice koje učenici Medrese prate.

Tribini su prisustvovali učenici svih razreda.

## Izvedba "Hasanaginice" u Lukavcu i Brčkom

U ponedjeljak, 28.marta 2022. u velikoj sali Centra za kulturu Grada Lukavca maturanti Behram-begove medrese izveli su dramu Alije Isakovića Hasanaginica. Premijerno izvođenje bilo je 22. februara ove godine u Behram-begovoj medresi.

U drami su glumili učenici četvrtog razreda Behram-begove medrese, a režiju potpisuje profesorica bosanskog jezika u Behram-begovoj medresi, Emina Hatunić.

Predstava je izvedena u organizaciji Medrese i Medžlisa Islamske zajednice Puračić sa sjedištem u Lukavcu. U prepunoj sali Centra za kulturu bili su prisutni mnogi uvaženi gosti, a glumci su nakon izvedbe drame nagrađeni gromoglasnim aplauzom.

U utorak, 29. marta 2022. godine drama Hasanaginica je izvedena i u velikoj sali Doma kulture Brčko, a u organizaciji Medrese i Medžlisa Islamske zajednice Brčko.

Jedan od povoda za izvedbu drame je 25. godišnjica od smrti Alije Isakovića, kao i skori jubilej same balade. Naime, za dvije godine će se navršiti tačno 250 godina kako je najveća bošnjačka narodna balada Hasanaginica prvi put objavljena. Tragična priča o časnoj Hasanaginici, i nesporazum između dvoje supružnika, privlačio je pažnju mnogih pisaca, pa je ova balada prevedena na dosta svjetskih jezika, a dobila je i desetak dramskih verzija. Isakovićeve dramske verzije ove priče ujedno i jedna od najpopularnijih dramskih verzija o Hasanaginici.

### Anisu Subašiću pročena hafiska dova

U srijedu, 30. marta 2022. godine, u džamiji Behram-begove medrese, proučena je hafiska dova Anisu Subašiću. Posljednje ajete je proučio pred Komisijom za hifz Rijaseta Islamske zajednice u Bosni i Hercegovini u periodu od 26. februara do 12. marta 2022. godine. A hifz je počeo učiti u trećem razredu Medrese. Muhafiz mu je bio Nedžad Vehabović, profesor u Behram-begovoj medresi.

Dovi su prisustvovali muftija tuzlanski Vahid-ef. Fazlović, direktor Behram-begove medrese Ahmed Hatunić, glavni imam Medžlisa Islamske zajednice u Tešnju Fuad-ef. Omerbašić, predstavnik Svjetske organizacije za hifz Džemal Muslih, te mnogobrojni hafizi, profesori, rodbina i prijatelji.

Gostima su se prigodnim riječima obratili muftija tuzlanski Vahid-ef. Fazlović, direktor Behram-begove medrese Ahmed Hatunić i glavni imam Medžlisa islamske zajednice Tešanj Fuad-ef. Omerbašić.

Diplomu u ime Rijaseta islamske zajednice u Bosni i Hercegovini hafizu Subašiću je uručio muftija tuzlanski, Vahid-ef. Fazlović.

Hafiz Anis Subašić je 87. hafiz naše škole i svršenic 345. generacije Behram-begove medrese. Rođen je u Zenici 2002. godine od majke Medine i oca Adisa. Student je prve godine Fakulteta islamskih nauka u Sarajevu.

## Upis učenika u prvi razred

Upis učenika u prvi razred u sljedećoj (2022/23.) godini vršit će se online, pomoću odgovarajuće aplikacije koja će biti dostupna na našoj web-stranici.

Za upis učenika neće se organizirati prijemni ispit, nego će biti uzeti u obzir njihov uspjeh u osnovnoj školi.

Aplikacija će biti aktivna nakon što Rijaset Islamske zajednice u Bosni i Hercegovini, osnivač Behram-begove medrese, raspiše konkurs za upis.

## O saradnji Maarifa i Medrese

U srijedu 6.4.2022. godine Behram-begovu medresu su posjetili Ahmet Emre Bilgili, član upravnog odbora turske fondacije Maarif, direktor Maarif škola u Bosni i Hercegovini Yakup Gul i Faruk Berat Akcesme, savjetnik za obrazovanje ambasade Republike Turske.

Susretu su prisustvovali Ahmed Hatunić, direktor Behram-begove medrese i pomoćnik direktora za nastavu, Fuad Imširović.

Razgovarano je o saradnji Maarif škola i Behram-begove medrese, povezivanju naše škole sa školama u Turskoj i o zajedničkim projektima koje bi Medresa mogla realizirati uz podršku ambasade Republike Turske i fondacije Maarif.

## Susret direktora Hatunića i takmičara

U prethodnom periodu učenici naše škole ostvarili su velike rezultate iz takmičenja koja su održana, a koja organizuje Rijaset islamske zajednice u Bosni i Hercegovini.

Takmičenja su održana iz arapskog, engleskog i bosanskog jezika, sire i historije. Zbog velikih uspjeha naših takmičara organizovan je prijem kod direktora Behram-begove medrese Ahmeda Hatunića, kojem su prisustvovali mentori i takmičari.

Direktor Hatunić je čestitao mentorima i takmičarima, te je istakao značaj predanosti i rada iza kojih neminovno dolazi i uspjeh.

## Aladinovci u Medresi

Djeca grupe Eden iz obdaništa Aladin u Tuzli u petak 15.4.2022. godine posjetili su Behram-begovu medresu.

Zajedno sa svojim učiteljicama Azrom Šljivić, Sanelom Bubić i Nerminom Berbić obišli su kompleks Medrese: učionice, biblioteku i džamiju.

Domaćin Aladinovcima je bio pedagog u Behram-begovoj medresi Ramiz Nurikić.

Mališani su počašćeni sokovima i čokoladama, a učiteljice su dobile Kur'an kao uspomenu na ovaj susret. Jedan od razloga ove posjete su i teme koje su radili na času vjeronauke, a to je teravih-namaz i porodična okupljanja.

Aladin postoji od 2002. godine i već dugo saraduje s našom školom u raznim aktivnostima.

## Ramazanski zijareti Autobusa prijateljstva

Prema planu rada Muftijstva tuzlanskog, Behram-begova medresa je i ove godine realizovala projekat Autobus prijateljstva.

U okviru svojih ramazanskih aktivnosti učenici i učenice Behram-begove medrese, zajedno sa svojim profesorima, putuju u različite džemate na području Muftiluka tuzlanskog gdje se upoznaju sa ljudima, običajima i znamenitostima tog mjesta. Tako je bilo i ovog mjeseca ramazana.

U svim medžlisima za predavače i učenike je pripremljen iftar, a nakon akšam-namaza učenici i učenice su u džematima izveli program sastavljen od učenja odabranih odlomaka iz Kur'ana, čitanja prevoda kur'anskih ajeta i hadisa, prigodnih recitacija o blagodatima mjeseca ramazana, te ilahija i kasida.

Na kraju programa prigodnim predavanjem su se obratili profesori Behram-begove medrese koji su bili u pratnji učenicima tokom svake od posjeta.

Predavanja su održali profesori: hfz. Asmir Imamović, hfz. Abdullah Kapo, Smail Hašarić, Kemal Jusufović, hfz. Amir Hodžić, hfz.



Nedžad Vehabović, Fadil Alić, Ervin Sejdinović, hfz. Edin Dedić, hfz. Mirnes Spahić, hfz. Muamer Kadrić i Nedim Alić.

Autobus prijateljstva ove godine je bio u posjeti Gračanici, Građaču, Brčkom, Živinicama, Kladnju, Kalesiji, Banovićima, Srebreniku, Lukavcu, Čeliću, Bijeljini, Modriči i Tuzli.

Već nekoliko godina Autobus prijateljstva u toku mjeseca ramazana putuje u sve medžlise Tuzlanskog muftijstva i širi toplinu i ljepotu ovog odabranog mjeseca.

Posebnost Autobusa prijateljstva je druženje učenika i učenica Medrese s mladima u medžlisima i džematima koje posjete.

### Učesnici Autobusa prijateljstva na prijemu kod direktora Medrese

Prijem kod direktora Behram-begove medrese Ahmeda Hatunića za učesnike Autobusa prijateljstva upriličen je u petak 22.4.2022. godine. Direktor Hatunić se zahvalio učenicima koji su učestvovali u ovom projektu. Istakao je značaj ovakvog druženja mladih i potrebu na proširivanju ovakvih programa. Učesnici Autobusa prijateljstva dobili su i hedije kao znak zahvalnosti od Medrese.

### Proljećni izlet na Toplicama

Učenici Behram-begove medrese su i ovo proljeće izašli u prirodu. Izlet je organiziran na odmaralištu Toplice kod Živinica. Bila je ovo prilika da se nakon dvije godine učenici i učenice druže.

Preljepo izletišta sa sportskim terenima i šetalištem ispunilo je očekivanja. Učenici su se družili i odmarali, a snagu su odmjerili u navlačenju konopca, igranju fudbala i odbojci.

Sportski dan je održan u srijedu 11. aprila ove godine.

### Osnovnoškolci iz Malešića u Behram-begovoj medresi

Našu školu su u četvrtak 12.5.2022. godine posjetili učenici devetog razreda Osnovne škole Malešići u Malešićima, kod Gračanice. U pratnji učenika bili su direktor ove škole Elvedin Čamdžić, pedagog

Almina Dedić, nastavnica Indira Randall i vjeroučitelj Sejad Hodžić. Učenici su obišli kompleks Behram-begove medrese, a njihova posjeta našoj školi i Tuzli je realizirana nakon obilaska Memorijalnog centra Potočari u Srebrenici.

Bila je ovo prilika i da se učenici ove osnovne škole dodatno informišu o Medresi i da dobiju više informacija o načinu upisa u našu školu.

## Učenici prisustvovali dženazi na Veljacima

Na šehidskom mezarju Veljaci u četvrtak 12.5.2022. godine klanjana je dženaza za četiri žrtve genocida počinjenog 1992. godine nad Bošnjacima u Bratuncu.

Četiri učenika Behram-begove medrese, koji su članovi školskog hora, učestvovali su u programu sa izvođenjem ilahije „Šehidi“. Programu i dženazi je prisustvovao reis-ul-ulema Islamske zajednice u Bosni i Hercegovini Husejn-ef. Kavazović koji se nakon klanjanja dženaze namaza obratio. Također, dženazi i prigodnom programu je prisustvovao i muftija tuzlanski Vahid-ef. Fazlović kao i mnogi glavni imami, hafizi, imami, članovi porodica ubijenih u genocidu u periodu od 1992. do 1995. godine.

## Konkurs za upis učenika u prvi razred

Konkurs za upis učenika u prvi razred medresa u Bosni i Hercegovini i Sandžaku za narednu školsku godinu objavio je Preporod u broju od 15. maja.

Prema odredbama tog konkursa, kandidati, kao i prošle godine, neće polagati prijemni ispit. Aplikacija za online prijavu kandidata za upis u našu medresu bit će objavljena 1.6.2022. godine na web-stranici [www.bbm.edu.ba](http://www.bbm.edu.ba).

Kandidiranje za upis će se moći obaviti samo preko te aplikacije, tj. svi kandidati će moći to obaviti u nekoliko jednostavnih koraka. Uz aplikaciju za upis, svaki učenik će elektronski priložiti odgovarajuće dokumente.

Kandidati koji su hafizi, učenici generacije u osnovnoj školi i učenici koji su ostvarili odličan uspjeh iz svih nastavnih predmeta i primjerno vladanje u posljednja četiri razreda osnovne škole bit će bodovani s najvećim brojem bodova po svim kriterijima bodovanja i odmah primljeni.

Rok za prijavu i upis kandidata je od 1. do 18. juna 2022. godine.

Behram-begova medresa će, nakon što istekne ovaj rok, objaviti rezultate upisa na svojoj web stranici.

### Ajla Mulić i Bakir Baković posjetili Dayton

U periodu od 15. aprila do 8. maja 2022. godine, učenici trećeg razreda Behram-begove medrese Ajla Mulić i Bakir Baković u pratnji profesora engleskog jezika u Behram-begovoj medresi Asmira Dorića boravili su u Sjedinjenim Američkim Državama. Riječ je o prestižnom programu obrazovne razmjene Američke ambasade u Bosni i Hercegovini pod nazivom "Youth Leadership Program".

U toku boravka u Americi bili su gosti kod američkih porodica u Daytonu, u saveznoj državi Ohio. Također su posjetili još tri američka grada: Cincinnati, Columbus i Chicago. Tokom posjete imali su priliku da prisustvuju radionicama i kampovima za mlade, da posjete nekoliko srednjih škola i univerziteta, da se upoznaju sa radom nevladinih organizacija, unaprijede svoje vještine liderstva za rad u lokalnoj zajednici i da se upoznaju sa kulturološkim specifičnostima i historijskim znamenitostima američkih gradova u kojima su boravili.

### Dodijeljeni certifikati takmičarima najuspješnijeg biznis plana

U utorak 17. maja 2022. godine uručeni su certifikati za učesnike koji su sudjelovali na takmičenju u pisanju najuspješnijeg biznis plana, a koji je organizirala Fondacija Predvodnik iz SAD-a u okviru projekta "Budući poduzetnici svijeta" (Future Entrepreneurs of the World ili FEW - BiH). Certifikati su dodijeljeni učenicima Atifu Mekiću, Salimu Čamdžiću, Muhamedu Mehiću i Eldaru Hajdiću. Oni su zauzeli treće mjesto na takmičenju u kojem je učestvovalo

osamnaest timova iz deset škola iz svih dijelova Bosne i Hercegovine. Koordinatorica projekta FEW BiH, profesorica Amila Hasanpahić je uručila certifikate i vrijedne nagrade za takmičare koji su predstavljali Behram-begovu medresu. Njihov mentor bio je profesor Ervin Sejdinović. Inicijativa kreiranja ovog programa je potekla od prijateljske fondacije Forerunner Federation (Fondacija Predvodnik) iz Sjedinjenih Američkih Država i njenog predsjednika Andrewa Balasa. Biznis planove su pažljivo pregledali i ocijenili sudije koji imaju ogromno iskustvo u poduzetništvu, uglavnom poduzetnici i vlasnici uspješnih biznisa, ali i iz drugih polja djelovanja koja se odnose na menadžment i poslovanje.

### Izveden program povodom odlaska maturantica

U četvrtak 19. 5. 2022. godine učenice trećeg razreda Behram-begove medrese izvele su program povodom ispraćaja maturantica naše škole.

Na početku programa učenica Amina Mrkonjić je proučila ašere, zatim su učenice trećeg razreda, članice sekcije hora, proučile ilahiju, i izvele kraći dramski program. Uslijedilo je čitanje teksta posvećenog maturanticama, zatim prozivka i podjela crvenih ruža.

Na kraju programa dovu je proučila učenica Sumeja Mahovkić.

Program povodom ispraćaja maturantica je postao tradicionalni događaj u našoj Medresi. Emotivan nastup učenica trećeg razreda kod svih prisutnih izazvao je velike emocije. Četiri godine provedene u internatu je vrijeme za koje su mnoge od njih stekle prijatelje za cijeli život. A svakako jedan od događaja koji će pamtiti je i ovo prelijepo druženje u koje su mlađe učenice utkale mnogo ljubavi i emocija.

Ovom programu su prisustvovala profesorice i učenice naše Medrese.

### Proljetne ekskurzije u Sarajevu, Tešnju i Mostaru

Proljeće je vrijeme kada se realizuju ekskurzije, a pogotovo nakon perioda zabrane okupljanja zbog pandemije, jednodnevni izleti svima dobro dođu, i učenicima i profesorima, kao dobar način da se

svi odmore od svakodnevnih obaveza. U prošloj sedmici realizovano je nekoliko posjeta našim gradovima.

Tako je jedno odjeljenje maturantica u srijedu 18.5.2022. godine posjetilo Mostar, Počitelj i Bunu, a drugo odjeljenje se odlučilo za posjetu uvijek zanimljivom Tešnju. Posjeta je iskorištena za obilazak stare Tešanjске tvrđave i Eminagića konaka.

Učenici i učenice drugog razreda Behram-begove su u subotu 28.5.2022. godine također bili u posjeti našoj prijestolnici Sarajevu. Ovu posjetu su iskoristili za obilazak Tunela spasa i šehidskog mezarja Kovači.

Članovi horske sekcije su u petak 27.5.2022. godine također boravili u Sarajevu. I ova posjeta je bila edukativnog karaktera, te je iskorištena za posjetu Tunelu spasa.

## Maturanti prošetalii svojim gradom

Svečanom šetnjom kroz Tuzlu u utorak 24.5.2022. godine svoje školovanje je okončala 346. generacija maturanata Behram-begove medrese. Maturanti su u pratnji svojih razrednika i odgajatelja krenuli ispred Behram-begove medrese, prošetalii do Trga slobode, a potom i do Kapije, prisjećajući se ubijene tuzlanske mladosti. Tu su položili bijele ruže i proučili Fatihu, te su krenuli prema Džindić džamiji. Tu su se prisjetili svojih profesora koji su ukopani u haremu ove džamije. Šetnja je završena dolaskom do ulaza u staru medresu, gdje je davne 1949. godine svoje školovanje okončala posljednja generacija učenika Behram-begove medrese, nakon čega je došlo do prisilnog zatvaranja. Ova 346. generacija maturanata Behram-begove medrese broji 60 učenika i 60 učenica. Razrednici maturantima su bili profesori Asmir Imamović i Dino Ćorović, dok je odgajatelj bio hafiz Abdullah Kapo. Razrednice maturanticama su bile profesorice Merzija Kasumović i Mejra Numanović, a odgajateljice Edina Đedović i Mersa Šabanović-Ibišević. Ova generacija je dala veliki broj nadarenih učenika koji su na raznim takmičenjima predstavljali našu školu i ostvarili izuzetne rezultate. Među njima je jedan hafiz i jedna hafiza. Učenik generacije je Amsal Avdihodžić, a učenica generacije je Lejla Dorić.

Maturalnom akademijom koja će biti održana u petak, 27.5.2022. godine završavaju se sve maturalne aktivnosti.

## Iz štampe izašao maturalni broj Misaka

U petak 27.5.2022. godine iz štampe je izašao 101.broj Misaka, a treći u ovoj školskoj godini.

Ovaj je broj u potpunosti posvećen maturantima 346. generacije Behram-begove medrese i oni su ga pripremili. S ovim brojem se opraštamo od ovogodišnje redakcije maturalnata Misaka, od glavne i odgovorne urednica Sumeje Muratović, zamjenice urednice Zulejhe Omerbašić i lektorice Maide Mehmedćehajić, kao i od ostalih članova koji su vrijedno pisali i radili za svoj Misak. Ovoj generaciji je pripala čast da pripreme izlazak jubilarnog 100. broja Misaka i manifestaciju Brojati do stotinu, koja je priređena ovim povodom.

Maturalni broj Misaka je štampan na 56 stranica, a izašao je u 800 primjeraka.

Ovaj broj je ujedno i najčitaniji i njegov izlazak iz štampe se uvijek iščekuje s velikim nestrpljenjem.

## Svečanom akademijom ispraćeni maturanti 346. generacije Behram-begove medrese

U prepunoj sali Bosanskog kulturnog centra u petak 27.5.2022. godine održana je svečana akademija maturalnata 346. generacije Behram-begove medrese.

Bogat kulturni program se sastojao od učenja Kur'ana, ilahija, kasida, recitala i posljednje prozivke maturalnata od njihovih razrednih starješina.

Svečanosti su prisustvovali muftija tuzlanski Vahid-ef. Fazlović, direktor Behram-begove medrese Ahmed Hatunić, ministar obrazovanja i nauke Tuzlanskog kantona Ahmed Omerović, rukovodilac Odjela za visoko obrazovanje Rijasete islamske zajednice Ekrem Tuucaković, mnogi prijatelji naše škole, roditelji i predstavnici raznih ustanova.

Ovogodišnja generacija broji 60 učenika i 60 učenica. Maturanti-ma u muškim odjeljenjima su razrednici bili hafiz Asmir Imamović i Dino Ćorović, a odgajatelj Abdullah Kapo. Maturantice su vodile razrednice Merzija Kasumović i Mejra Numanović, a odgajateljice su bile Edina Đedović i Mersa Šabanović-Ibišević.

Ovo generacija je iznjedrila veliki broj učenika koji su na raznim takmičenjima na najbolji način predstavili svoju školu. Također je dala i hafiza Muhameda Ćiraka i hafizu Zulejhu Omerbašić.

Učenik generacije je Amsal Avdihodžić, a učenica generacije je Lejla Dorić.

## Osnovnoškolci iz Kozarca u Medresi

U subotu 28.5.2022. godine u organizaciji Centra za napredne studije iz Sarajeva, Behram-begovu medresu su posjetili učenici Osnovne škole Kozarac iz Kozarca.

Pedagog Behram-begove medrese Ramiz Nurikić družio se sa gostima i ovom prilikom u amfiteatru naše škole održao je predavanje o historiji Medrese, nakon čega su gosti imali priliku pogledati kratki film o našoj školi.

Nakon toga su obišli kompleks Medrese: učionice, biblioteku, džamiju i sportske terene. Sa učenicima je bio profesor bosanskog jezika u Osnovnoj školi Kozarac Amel Suljić i četvero nastavnika ove škole.

Edukativna ekskurzija je upriličena u okviru dvodnevnog seminara Ljudske slobode-Pravni aspekti i književne perspektive koji je održan u Kozarcu, a u organizaciji CNS-a iz Sarajeva.

## Dan alumnista Behram-begove medrese

U Behram-begovoj medresi je 31. maj ustanovljen kao dan alumnista. Ovaj datum je odabran u znak sjećanja na akademiju prve generacije naše škole u njenom obnovljenom radu, a koja je održana 31. maja 1997. godine.

Susret diplomanata je zamišljen kao druženje i podsjećanje na dane provedene u Medresi u vrijeme školovanja u njoj.

Program se sastojao od ilahija i kasida i dramskog monologa, a članovi recitatorske sekcije su podsjetili i na historijat Medrese i osnivača Behram-bega. Bilo je lijepo prisjetiti se davne 1993. godine, kada je došlo do reaktiviranja rada, i podrumskih učionica u osnovnoj školi Jala u Tuzli.

Mnogi alumnisti iz prve, druge i kasnijih generacija su prisustvovali današnjem programu. Prisustvovali su i muftija tuzlanski Vahid-ef. Fazlović, direktor Ahmed Hatunić, ministar obrazovanja i nauke Tuzlanskog kantona Ahmed Omerović, direktor Biblioteke Behram-beg Admir Muratović idr.

Alumnisti Behram-begove medrese, njih preko 2.500, rade i djeluju širom Bosne i Hercegovine i svijeta. U ovom danu će se i narednih godina moći družiti i prisjećati starih vremena.

### Upis kandidata u prvi razred u 2022/23. šk. god.

Aplikacija za upis u prvi razred Behram-begove medrese u školskoj 2022/23. godini postavljena je na zvaničnoj web-stranici Medrese.

Vrijeme za prijavu kandidata je od 1. do 18. juna ove godine.

Ovu aplikaciju treba da popune svi kandidati za upis. To je jedini način prijavljivanja kandidata.

Važan preduslov za njeno popunjavanje je registracija Google adrese, tipa ime.prezime@gmail.com. Ta registracija je besplatna i omogućuje svim kandidatima validno apliciranje i pregled unesenih podataka.

Samo popunjavanje aplikacije je jednostavno i potrebno je slijediti korake koji su naznačeni na bosanskom jeziku.

Na kraju je potrebno, u predviđenim rubrikama, priložiti skenirane ili na drugi način preslikane dokumente (Izvod iz matične knjige rođenih, uvjerenja o uspjehu u osnovnoj školi, svjedodžbu o završenoj osnovnoj školi i posebne diplome i uvjerenja) i apliciranje je time završeno.

Na predočeni e-mail kandidata doći će potvrda o uspješnom popunjavanju obrasca.



## Podsjećanje na velikana bosanskohercegovačke književnosti Aliju Isakovića

U okviru Kulturno-vjerske manifestacije Dani Hasana Kaimije u Behram-begovoj medresi je u utorak 7.6.2022. godine održano predavanje o Aliji Isakoviću, a povodom 90 godina od njegovog rođenja.

Moderator je bio profesor Nedin Alić, a predavači su bili prof. Mustafa Spahić i prof. Hadžem Hajdarević. U svom obraćanju podsjetili su nas na ovog izuzetnog književnika, romansijera, pripovjedača, leksikografa, povjesničara jezika.

Glavni imam Medžlisa Islamske zajednice Zvornik Mustafa-ef. Muharemović također se obratio prisutnima.

Bila je ovo prilika da se prisjetimo i pedeset godina od izlaska Biserja, prve antologije muslimanske književnosti i trideset godina od prvog Rječnika karakteristične leksike bosanskog jezika

Alija Isaković je poznati bosanskohercegovački književnik koji je rođen 15. januara 1932. godine u Bitunji kod Stoca. Poznata su mu djela Sunce o desno rame, Semafor, Građa za bibliografiju muslimanske književnosti 1883-1971., Hasanaginica, Taj čovjek, Lijeve priče, Pobuna materije, Biserje.

Umro je 1997. godine u Sarajevu.

## Hor Behram-begove medrese nastupio na Internacionalnom horskom šampionatu

Povodom deset godina postojanja tuzlanskog hora Lege artis u subotu 11.juna 2022. godine u Bosanskom kulturnom centru u Tuzli održano je revijalno veče horova.

Po prvi put učestvovao je i hor Behram-begove medrese s tri ilahije: Puhn timer behar u izvođenju Melike Delić, Jedno smo u izvedbi Ajle Kušljugić, a ilahiju Zovemo te solirala je Amina Kunić.

Učestvovali su i hor Iskre iz Tuzle, hor Muzičke škole Katarina Kosača-Kotromanić iz Žepča, hor Slovenčice iz Tuzle, kamerni hor Emanuil iz Valjeva, hor Libero iz Živinica i hor Lege artis iz Tuzle.

Bilo je ovo jedno izuzetno iskustvo za članice našeg hora, a nakon sjajnih izvedbi nagrađene su gromoglasnim aplauzom. Poziv za učešće na Internacionalni horski šampionat je upućen i za narednu godinu.

## Učenici Građevinsko-geodetske škole u posjeti Medresi

Našu školu su 25.5.2022. godine posjetili učenici drugog razreda Građevinsko-geodetske škole u Tuzli, smjer arhitektonski tehničari u pratnji profesorice Jasminke Dropić. Ova posjeta je realizovana u sklopu redovne terenske nastave. Učenici su obišli džamiju, biblioteku i amfiteatar, te su prilikom obilaska ovih objekata mogli da uoče detalje iz stručnih predmeta vezanih za arhitekturu.

## Promovisana knjiga "Izazovi memorizacije genocida u Bosni i Hercegovini"

U amfiteatru naše škole u srijedu 15.6.2022. godine održana je promocija knjige Izazovi memorizacije genocida u Bosni i Hercegovini.

O ovoj izuzetno važnoj temi pričali su muftija tuzlanski Vahid-ef. Fazlović, glavni imam Medžlisa Islamske zajednice Srebrenica Damir-ef. Peštalić, dr. Ferid Dautović, dr. Hikmet Karčić i mr. Mustafa Muharemović.

Muftija Fazlović je u svom obraćanju istakao važnost ovog zbornika radova koji predstavlja vrijedan doprinos u sticanju znanja o dosadašnjim poduhvatima memorijalizacije Genocida, te o nagovještajima predstojećih aktivnosti na tom planu.

O važnosti memorijalizacije Genocida glavni imam Medžlisa Islamske zajednice Srebrenica Damir-ef. Peštalić je u svom obraćanju ukazao na činjenicu da u nastavnim planovima i programima nije na adekvatan način zastupljena tema o počinjenim zločinima nad Bošnjacima.

Dr. Hikmet Karčić, naučni saradnik Instituta za islamsku tradiciju Bošnjaka problematizirao je uništavanje dokaza i lokaliteta gdje su bile masovne egzekucije.

Direktor Instituta za islamsku tradiciju Bošnjaka, dr. Ferid Dautović istakao je da je povodom obilježavanja 25. godišnjice Genocida u Srebrenici 2020. godine održan naučni skup „Izazovi memorijalizacije genocida u Bosni i Hercegovini, nakon kojeg je Institut za islamsku tradiciju Bošnjaka izdao ovaj zbornik radova.

Predsjednik Medžlisa islamske zajednice Zvornik Mustafa-ef. Muharemović podsjetio je na ubijanje imama tokom Agresije na Bosnu i Hercegovinu.

Promocija je organizovana u okviru programa Muftijstva tuzlanskog kojim se obilježava dvadeset i sedma godišnjica od počinjenog Genocida.

Organizator promocije je Muftijstvo tuzlansko i Institut za islamsku tradiciju Bošnjaka.

## Medresini takmičari na izletu u Sarajevu i Visokom

Učenici koji su predstavljali našu školu na kantonalnim i medresanskim takmičenjima, a ostvarili su izuzetne rezultate, nagrađeni su ekskurzijom. Njih trideset šest su sa svojim mentorima u četvrtak 16.6.2022. godine boravili u Sarajevu i ovu posjetu prijestolnici su iskoristili za obilazak Gazi Husrev-begove biblioteke. Nakon toga su posjetili i Visoko.

U medresi Osman-ef. Redžović u Visokom učenicima se obratio direktor Medrese prof.Dženan Handžić. Također su prisustvovali i času historije koji je održao profesor Emir Uzunalić. Nakon toga su posjetili planetarijum. Inače, ovo je jedina Medresa koja posjeduje planetarijum, a koji je u proteklom periodu posjetilo preko 3000 učenika i studenata.

## Hasanaginica u Zvorniku

Centralna svečanost manifestacije Dani Hasana Kaimije održana je 14. juna u sali Doma omladine u Zvorniku, gdje su maturanti Medrese izveli dramu Hasanaginica.

Nakon što je uspješno izvedena u Tuzli, Lukavcu, Brčkom i Gračanici, završna izvedba bila je u Zvorniku, i na taj način glumci su se oprostili od ove drame, kao i od uloge učenika Medrese.

S učenicima je sve vrijeme bila profesorica Emina Hatunić, kao režiser projekta, a u pratnji su bili i profesori Smail Hašarić, hfz. Abdulah Kapo, hfz. Nedžad Vehabović i Bekir Šabić.

## Sportisti na nagradnoj ekskurziji u Osijeku

U protekloj školskoj godini sportisti Behram-begove medrese osvajali su prva, druga i treća mjesta na raznim gradskim, kantonalnim i državnim takmičenjima. Nakon mnogobrojnih pehara koje su sportisti donijeli u našu školu nagrađeni su jednodnevnim izletom u Hrvatsku.

U petak 17.6.2022. godine u pratnji svog mentora profesora tjelesnog odgoja Samira Spahića, pedagoga škole Ramiza Nurikića i sekretara Sevreta Mehmedćehajića posjetili su Osijek. Domaćin u ovom slavonskom gradu bio je glavni imam Medžlisa Islamske zajednice Osijek Senad Hevešević. Neizostavni dio posjete bio je obilazak gradskog stadiona Gradski vrt u ovom gradu i posjeta sjedištu istoimenog Medžlisa. Nakon toga posjetili su i centar grada, te su obišli i njegove znamenitosti.

Bila je ovo izuzetna sezona za sportiste Behram-begove medrese, a iza čega stoje sedmice priprema i odricanja. Naši sportisti su kantonalni prvaci u atletici, kantonalni viceprvaci u malom nogometu, a osvojili su i srebro na kantonalnom takmičenju iz košarke, te su u našu školu donijeli bronzano odličje iz odbojke sa gradskog takmičenja. Također su prvo mjesto osvojili na državnom nivou u štafeti, bili su prvi u trčanju na 100 metara na Tuzlanskom kantonu i državni prvaci u trčanju na 100 metara na takmičenju održanom za juniore.

## U Medresi izvedena predstava "Pričajmo naglas"

U četvrtak 16.6.2022. godine u Behram-begovoj medresi izvedena je forum predstava Pričajmo naglas. U ovom projektu su

učestvovala učenice Gimnazije Meša Selimović iz Tuzle, Gimnazije Ismet Mujezinović i učenice Behram-begove medrese. Mentorica na ovom projektu je bila Ivana Milosavljević. Ovaj uradak se sastojao od nekoliko kraćih dramskih izvedbi koje prate tematiku nasilja sa kojom se učenici susreću u svom okruženju. Cilj je bio upoznati učenice sa ovom problematikom, te i njih kao gledaoce uključiti u rješavanje problema, tako što će se naći u ulozi glumaca.

Projekat Pričajmo naglas finansiran je od strane neprofitne organizacije Ekumenske inicijative za žene. Ovaj projekat je posvećen osnaživanju uloge žene u jačanju civilnog i međureligijskog dijaloga, kako bi se kroz snagu vjere ojačale pozitivne promjene u zajednici.

Organizator projekta je Teatar kabare Tuzla.

## **Emina Omerkić osvojila prvo mjesto u završnom projektu o profesionalnoj orijentaciji**

Učenici završnih razreda srednjih škola s područja Tuzlanskog kantona u četvrtak 16.6.2022. godine u prostorijama Visokoškolske ustanove Finra u Tuzli su prisustvovali završnoj manifestaciji projekta Profesionalna orijentacija. U projektu je učestvovalo trideset škola s preko stotinu učesnika u radionicama Mala škola programiranja i informatike, Mala škola računovodstva i knjigovodstva, Mala škola izrade biznis plana i Mala škola poslovnog engleskog jezika. Radionice su realizovane u periodu od februara do juna 2022. godine. Za učesnike radionica je organizovano i finalno takmičenje.

Naša učenica Emina Omerkić osvojila je prvo mjesto, a Edina Bajrić drugo mjesto u radionici Mala škola poslovnog engleskog jezika. Na radionici Mala škola biznisa naša učenica Amina Hadžić osvojila je drugo mjesto, a učenik Amar Ćidić je osvojio treće mjesto. Učenici su i nagrađeni za svoj trud te su im uručeni tablet, power bank i bluetooth zvučnici.

Osnovni cilj projekta je podrška srednjoškolcima u njihovom izboru budućeg zanimanja i profesionalnoj orijentaciji.

## **Zejneb Halilović nova hafiza naše škole**

U utorak 21.6.2022. godina Zejneb Halilović je pred Komisijom za hifz Rijaseta Islamske zajednice u Bosni i Hercegovini proučila zadnje ajete Kur'ana i time je stekla časno zvanje hafize Kur'ana.

Zejneb Halilović je 88. hafiz naše škole. Četvrti razred Behram-begove medrese završila je u maju ove godine, a hifz je počela učiti u prvom razredu Medrese. Uz sve obaveze oko učenja hifza Zejneb je bila odlična učenica tokom školovanja u Medresi. Muhafiz našoj hafizi je bio hafiz Nedžad Vehabović, profesor u Behram-begovoj medresi.

## **Nagradna ekskurzija u Visoko**

U utorak 21. juna 2022. godine realizovana je nagradna ekskurzija za učenike koji u prvom polugodištu nisu imali izostanke sa nastave.

Učenici su u pratnji svojih razrednih starješina posjetili Visoko i piramide. U tunele u parku Ravne 2 prisustvovali su historijskom času, a nakon toga su posjetili Sarajevo.

Ovom ekskurzijom učenici su nagrađeni zbog svog zalaganja i odgovornosti, jer u ovom periodu nisu izostajali sa nastave, predano su radili i ostvarili izuzetne rezultate.

Arheološko-turistički park Ravne 2 je zvanično otvoren 18. juna 2016. godine. Prostire se na površini od 100.000 kvadratnih metara. U prethodnom periodu ovaj park je posjetilo preko 65.000 ljudi iz cijelog svijeta.

## **Završena nastavna 2021/2022. godina**

Nastava za školsku 2021/22. godinu završena je u srijedu 22.6.2022. godine. Učenici prvog, drugog i trećeg razreda su otišli na zasluženi ljetni raspust. Ova školska godina je za našu školu bila izuzetno uspješna. Naši učenici su na raznim takmičenjima pokazali veliki entuzijazam, te su našu školu predstavljali na najbolji način.

U ovoj školskoj godini imali smo četiri hafiske dove. Bili smo kantonalni prvaci iz biologije, kantonalni viceprvaci iz geografije, kantonalni prvaci iz informatike, kantonalni i federalni šampioni iz fizike.

Učenik prvog razreda Muhamed Numanović se plasirao na međunarodnu olimpijadu iz fizike.

Bili smo prvaci na kantonalnom takmičenju iz historije, kantonalni viceprvaci iz hemije, a četiri kandidata su se plasirala na federalno takmičenje iz matematike. Naši predstavnici su osvojili pet nagrada iz engleskog jezika na kantonalnom takmičenju.

Na međumedresanskim takmičenjima smo osvojili prvo mjesto iz engleskog jezika, prvo mjesto iz arapskog jezika, i prvo mjesto iz bosanskog jezika. A na takmičenju iz sire osvojili smo drugo mjesto.

Također je ovo bila izuzetna godina za naše sportiste. Oni su kantonalni prvaci u atletici, kantonalni viceprvaci u košarci. Osvojili su drugo mjesto na gradskom takmičenju iz košarke i treće mjesto na gradskom takmičenju u odbojci. Također su kantonalni prvaci u malom nogometu.

Članovi dramske sekcije su izveli dramu Hasanaginica u više bosanskohercegovačkih gradova. A članovi novinarske sekcije uspjeli su da organizuju izlazak četiri broja školskog lista Misak.

Učenici naše škole se ponovo vraćaju u školske klupe u septembru.

## Održano savjetovanje obrazovnih ustanova IZ-e u Visokom

Savjetovanje srednjoškolskih obrazovnih ustanova Islamske zajednice održano je u medresi Osman-ef. Redžović u Visokom, u periodu od 24. do 26.6.2022. godine.

U medresi si boravili direktori, pomoćnici direktora za nastavu i učenički dom i sekretari iz medresa i gimnazija u Cazinu, Mostaru, Sarajevu, Travniku, Banjoj Luci, Zagrebu i Tuzli.

Teme o kojima se govorilo su godišnji kalendar rada medresa u 2022/2023. godini, pitanje povećanja cijena participacije u učeničkim domovima, informacije o broju upisanih učenika u 2022/2023. godini, predstavljanje projekta Pod nebom vedre vjere- Islam i Evropa u iskustvu Bosne. Diskutovalo se i o potrebi donošenja novih pravilnika.

Učesnici su obišli kompleks Medrese, posjetili njen planetarijum i muzej. Obišli su Zavičajni muzej u Visokom i piramide i park Ravne 2 i tunele. Domaćin je bio Semir Osmanagić.

U nedjelju 26.6. 2022. godine zadnji dan Savjetovanja, organizovana je posjeta izletištu Ponijeri i parku prirode Tajan. U prelijepom prirodnom ambijentu izletišta, koje je u vlasništvu MIZ Kakanj, domaćin je bio glavni imam Medžlisa Islamske zajednice Kakanj Suljman-ef. Čeliković, a razgovaralo se o mnogim važnim pitanjima vezanim za rad medresa i gimnazija Islamske zajednice u Bosni i Hercegovini.

### Održan seminar za profesore engleskog jezika TELTS 2022

U Behram-begovoj medresi je 23. i 24.6.2022. godine održan jedanaesti Tuzla English Language Teaching Seminar (TELTS) 2022-Game on, za profesore i nastavnike engleskog jezika u Bosni i Hercegovini. Svečanom programu otvaranja seminara, koji je upriličen 23.juna 2022. godine prisustvovali su direktor Behram-begove medrese Ahmed Hatunić, ministar obrazovanja i nauke Tuzlanskog kantona dr. Ahmed Omerović, ataše za kulturu i obrazovanje pri Američkoj ambasadi u Sarajevu Christienne Carroll, direktor Regionalnog ureda za programe engleskog jezika (RELO) pri Američkoj ambasadi u Beogradu Kevin McCaughey, ekspert za kulturu i obrazovanje u Američkoj ambasadi u Sarajevu Elizabeta Delić te predstavnici univerziteta u Tuzli i drugih partnerskih institucija. Predavači na seminaru su bili američki profesori i stručnjaci iz područja metodologije nastave engleskog jezika, te lokalni predavači koji su učestvovali u obrazovnim programima koje nudi State Department i Ured za programe engleskog jezika. Ovaj dvodnevni seminar je organizovala Behram-begove medrese i Muftijstvo tuzlansko, u saradnji sa Ambasadom Sjedinjenih Američkih Država u Bosni i Hercegovini, uz podršku Pedagoškog zavoda Tuzlanskog kantona i Ministarstva obrazovanja i nauke TK, Univerziteta u Tuzli i Udruženja profesora engleskog jezika Tuzlanskog kantona (TETA). Ove godine seminaru je prisustvovalo stotinu nastavnika iz cijele Bosne i Hercegovine. Seminar je poslužio kao dobra platforma za razmjenu iskustava i saradnju.



## Uručen halal certifikat za restoran Behram-begove medrese u Tuzli

Svečana dodjela halal certifikata za restoran Behram-begove medrese u Tuzli upriličena je u petak, 15. jula 2022. godine. Ovim certifikatom uspostavljen je sistem za praćenje nabave, pripreme i posluživanja jela u skladu sa zahtjevima i odredbama Halal standarda BAS 1049:2010.

Svečanosti su prisustvovali muftija tuzlanski dr. Vahid-ef. Fazlović, direktor Behram-begove medrese dr. Ahmed Hatunić, direktor Agencije za certificiranje halal kvalitete mr. Damir Alihodžić i uposlenici ovih ustanova.

Muftija Fazlović je uručio certifikat direktoru Hatuniću te je kazao da su standardizacija i inovacija ključni elementi razvoja. Standardi predstavljaju kvalitet, a certificiranje je potvrda tog kvaliteta. Behram-begova medresa kontinuirano nastoji unaprijediti svoj rad i kvalitet usluga.

- Implementacijom Halal standarda potvrđuje se halal kvalitet usluga koje Behram-begova medresa pruža svojim učenicima, osoblju i gostima. Medresa je jedna od najvažnijih ustanova Islamske zajednice na ovome području. Učenici i učenice koji je pohađaju značajan dio svoga vremena i života provedu u internatu ove škole. Stoga je jako bitno da uslovi u kojima borave ti mladi ljudi budu što bolji. Behram-begova medresa pruža gostoprimstvo i velikom broju gostiju što predstavlja veliku blagodat i bereket - kazao je muftija Fazlović.

Direktor Hatunić je iskazao zadovoljstvo što je Behram-begovoj medresi uručen ovaj certifikat.

- Veoma smo radosni što smo uspješno okončali ovaj zahtjevan i odgovoran zadatak. Put do ispunjavanja svih zahtjeva i dobivanja halal certifikata je trajao duže od šest mjeseci i nije bio nimalo lahak, čak je zahtijevao više napora i rada nego drugi standardi - istakao je dr. Hatunić.

Svoje zadovoljstvo što je uspješno okončan još jedan proces implementacije Halal standarda iskazao je i direktor Alihodžić. On je kazao da je Behram-begova medresa dobijanjem halal certifikata za restoran i u ovoj oblasti potvrdila svoje opredjeljenje za stalnim

napredovanjem i prva je obrazovna ustanova Islamske zajednice u Bosni i Hercegovini koja je okončala ovaj proces.

- Ovim certifikatom se dodatno potvrđuje halal kvalitet i sistem koji podrazumijeva da sve namirnice za pripremu jela imaju halal porijeklo. Također, potvrđuje se da se vodi računa o higijeni i zdravstvenoj ispravnosti i korisnosti namirnica za one koji ih konzumiraju - istakao je direktor Alihodžić.

Interes za halal certificiranje su iskazale i druge medrese, obdaništa, studentski centri i restorani u okviru Islamske zajednice u Bosni i Hercegovini.